

昭

代

典

則

歷代典則卷十三

賜進士太子少保刑部尚書晉江黃光昇編輯

吳郡陸翀之校

金陵周曰校刊

成祖文皇帝

癸未永樂元年春正月以陳瑛爲左都御史○復封周王於河南齊王於青州湘王賜諡曰獻治其墳廟代王岷王皆脫拘囚還其封爵○二月以北平爲北京華都布按三司置北京行部及行後軍都督府以郭資碓斂爲行部尚書平安爲行都督僉事

北京行部設尚書二人侍郎四人其屬爲六曹清吏司

吏禮兵工曹郎中員外主事各一人戶刑曹各二人
改戶刑二部北平清吏司爲北京清吏司以北平府爲順
天府遣指揮朵兒只恍惚等書諭鬼力赤可汗通好不報
○三月改北平行都司爲大寧都司徙保定以大寧爲地
界三衛

朵顏福餘大寧三衛初爲兀良哈地在烏龍江南漁陽
塞北春秋時卽山戎地秦時爲遼西北境漢爲奚酋所
據後魏號庫莫奚服屬契丹元爲大寧路國初割錦義
建利諸州隸遼東而於古會州大寧之地設北平行都
司領興營等二十餘衛所洪武十四年封皇子權於大
寧爲寧王二十二年封兀良哈爲朵顏福餘大寧三衛

初而以阿札失里等爲三衛指揮使同知爲我
祖靖難首刼大寧兵及名兀良哈諸酋率部落
從行有功乃移封寧王於南昌改北平行都司爲大寧
都司徙之保定散布與營諸衛於京府之境而以大寧
地盡昇三衛東起廣寧前屯歷喜峰近宣府爲朵顏自
黃泥窪逾潘陽鐵嶺至開原爲福餘由錦義渡遼河至
白雲山爲大寧皆逐水草無恒居三衛朵顏最強分地
又最險自是遼東宣府聲援隔絕諸夷列我險阻闖我
門庭要我官賞殘我吏民喜峰三屯密雲白羊僅僅收
縮譬之左臂癰腫則上谷孤子後背偃僂則盧龍卑薄
哽其喉吭則遼海坐隔扼其胸背則陵寢警逼失計甚

矣

夏四月命戶部尚書夏原吉治水江南以郁新爲戶部尚書

原吉上言浙西諸郡蘇松最居下流常嘉湖三郡土田高多下少環以大湖綿五百里納杭湖宣歙諸山水注澱山諸湖入三泖頃浦港湮塞匯流漲溢傷害苗稼拯治之法宜浚吳淞諸浦港洩其壅淤以入於海吳淞江袤二百餘里廣百五十餘丈西接太湖東連海前代屢疏以當潮汐沙泥淤積旋疏旋塞自吳江長橋至下界浦約百二十餘里雖稍通流多有淺窄又自下界浦抵上海南倉浦口可百三十餘里潮汐壅障葑蘆叢生已

成平陸欲卽踰浚工費浩大。王滌沙淤汴。決河重。以施工。臣等相視得嘉定劉家港卽古婁江。徑通大江。常熟白茆港。徑入大江。皆廣川浚流。宜䟽吳松江南北兩岸。安平等浦港。引太湖諸水。入劉家白茆二港。使直注海。松江大黃浦。乃通吳松要道。下流壅塞。難卽䟽浚。傍有范家港。至南倉浦口。可徑達海。宜浚令深濶。上接大黃浦。以達茆湖之水。此卽禹貢三江入海之迹。俟旣開通。相度地勢。各置石閘。以時啓閉。每歲水涸時。修圩岸。以禦暴流。上從之。役夫凡十餘萬。原吉布衣徒步。日夜經畫。暑者揮蓋去。曰。衆赤體暴日中。吾何忍。於是水洩。農田大利。

太白出昴北○五月上皇考妣號諡

皇考曰太祖聖神文武欽明啓運俊德成功統天大孝高皇帝皇妣曰孝慈昭憲至仁文德承天順聖高皇后遼東都指揮沈永有罪伏誅

先是虜寇侵遼東三萬衛永不能追襲又匿不以聞上以欺蔽誅之令兵部榜諭天下都司軍衛凡有賊寇不卽奏聞者鎮守官以下罪與永同

瀋陽中屯衛軍唐順請開衛河轉運下廷臣議

瀋陽中屯衛軍士唐順言衛河之源出衛輝府輝縣西北八里大行蘇門山下其流自縣治北經衛輝城下入大名府濬縣界逕抵直沽入海前距黃河陸路五十

餘里若開衛河距黃河百步置倉廩受南方所運糶餉轉致衛河交運公私兩便上曰此策亦是命廷臣詳議如議可行亦候民力稍甦行之

命法司嚴責南陽鄧州官

南陽鄧州官牛疫斃者多有司嚴責民償民貧至有鬻男女以償者事聞上大怒曰朕焚孔子問傷人不問馬今以人易牛何其不仁哉況畜牛本以爲民今反毒民命悉免償所鬻男女官贖還之仍命法司治擅責民償之罪

右副都御史黃信以漏泄獄情誅

先是李至剛妻父有犯都察院逮問當處以重刑至剛

乞免於上。上曰：法司鞠獄情之輕重，外人何以知之？對曰：此黃信與臣言。上命錦衣衛鞠之，有實狀特命誅之。

楚世子孟烷奏乞遣人於河南境內買人口，不許。

楚世子孟烷奏欲遣人於河南境內買人口，賜勅諭曰：昔秦愍王遣人於湘江買人口，太祖聞之大怒，秦府官屬及郡縣承行者皆被罪。且河南汝伯父周王封地，汝所遣人入境，或有縱恣，將斥爲爾過，可不慮乎？其已之。六月，太祖高皇帝實錄成。○秋八月，命平江伯陳瑄總督海運。○九月，歷城侯盛庸暴卒。

庸安戢山東，致仕千戶王欽上庸罪狀，欽卽陞指揮同。

知賞銀百兩。左都御史陳瑛復劾庸口出怨言。心懷不
國。請誅庸。遂削庸爵。暴卒。

久。十月遣靖安侯王忠安集北平。○長興侯耿炳文暴卒。
左都御史陳瑛劾炳文衣服器皿僭飾龍鳳。玉帶僭用
丹鞋。華。上曰。炳文先朝老臣。亦爲此。其速改。炳文大懼。
暴卒。長子璿駙馬都尉。建文帝遜去。杜門稱疾。竟坐罪。
死。公主亦以憂卒。仲子獄。先以都督保山海關。嘗請楊
文攻永平。以動北平。不聽。至是論死。

以金忠爲兵部尚書。○置三大營。設總兵官。

京城操練之法。洪武時立爲五軍營。分大小教場。與城
外城內操練。永樂初分爲三大營。曰五軍營。有步隊馬

孫專教陣法曰神機營。皆步隊。肄習火器。曰三千營。皆馬隊。專扈從出入。管車輦寶藏等事。每營以公侯伯二人充提督總兵官。

十一月定武職新舊官襲替法

今洪武三十二年至三十五年。奉天征討。獲功陞職者。爲新官。子孫年十六出幼襲替。免比試。三十一年以前者。爲舊官。子孫年十五出幼襲替。俱比試。永樂元年以後。獲功者。出幼比試。與舊官同。

高唐州民王政建言治道。擢爲刑科給事中。○賜鎮遠侯鎮成銀幣。

上謂侍臣曰。漢武帝窮兵黷武。以事夷狄。全盛之力。盡於

致凋耗當時雖得善馬豈足償萬一之費朕今休息天下惟望時和歲豐百姓安寧至於外夷但思有以備之必不肯自我擾之以罷敝生民近成言今日惟當安養中國慎固邊方此言甚合朕意蓋斯人老成非喜功好勝之流以是特嘉獎之

命郡縣考滿官於六科辦事各言所治郡縣事

初上欲聞民所疾苦命吏部尚書蹇義等凡郡縣官考滿至京選其識達治體者令且於六科辦事俾各言所治郡縣事至是尚未有言者上諭給事中朱原貞等曰郡邑之間豈都無一事利害可言今在朕左右尚猶默默況遠在千萬里外肯言乎爾等退以朕意申諭之

其所治何利當興何弊當革皆勿隱於今不言有他人言之則不能逃罪矣

閏十一月封黎蒼爲安南國王李芳遠爲朝鮮國王○通政使趙彛引奏獻陣圖者斥之

通政使趙彛等引奏山東男子獻陣圖者上曰自古帝王用兵皆出於不得已今天下無事惟當休養斯民修禮樂興教化豈復當言用兵此輩狂妄必謂朕有好武之意故上此圖以冀進用其斥去之

勅解縉等修古今列女傳○十二月選天下殷實民徙居順天府實京師籍名富戶

甲申二年春正月賜進士曾榮等四百七十二人及第出

有差

禮部奏請會試選士之數上問洪武中所選幾何當世
李至剛對曰各科不同多者四百七十餘人少者三百
人上曰朕卽位初取士姑率其多者後不爲例

改封敷惠王允熾爲甌寧王奉懿文皇太子祀○命通政
趙居任使日本令十年一貢

日本屢寇濱海郡縣靖難後日本遣人來貢并擒獻犯
邊賊二十餘人縛致甌中丞死至是遣通政趙居任賜
日本王冠服文綺金銀古器書畫又給勘合百道令十
年一貢每貢正副使母過二百人若貢非期人船踰數
夾帶刀鎗並以寇論居任還不受日本餽上喜厚賜

之

命六科給事中庶務失中直言無隱

上御奉天門召六科給事中諭曰朕日臨百官可否廢務或有失中爾等宜直言無隱又顧解縉等曰敢爲之臣易求敢言之臣難得敢爲者強於已敢言者強於君所以王魏之風世不多見欲使進言者無所畏聽言者無所忤天下何患不治朕與爾等勉之

諭吏部選官以才優者治事德厚者牧民○以國子監祭酒徐旭爲翰林院修撰

禮部言國子監祭酒徐旭書奏不謹當降上問吏部尚書蹇義曰徐旭爲人何如義曰有文學持守而於人

寡合。上曰：持守之人固當寡合。蓋其中有所主而不能脂韋依阿於外。况兼有文學，宜置之近侍，遂命爲翰林修撰。

夏曰：月簡東宮官，以蹇義兼詹事，解縉翰林學士兼右春功大學士，黃淮、胡廣、左右庶子、胡儼、楊榮、左右諭德、楊士奇、左中允、立世子高。爲皇太子高煦，爲漢王高燧，爲趙王。

靖難兵起時，世子居守。高煦有膂力，善騎射，從行頗有功。江上之戰，靖難兵稍却，高煦適引胡兵至。文皇撫其背曰：吾力倦矣，汝努力已而。議建儲，藩府舊臣洪國公、丘福、駙馬王寧皆言：高煦時時稱二殿下。文皇曰：居守。

功高於扈從儲貳定於嫡長且元子仁賢真社稷主汝等勿復言至是立世子東宮封高煦漢王國雲南高燧趙王國彰德高煦快快不肯去曰我何罪斥我萬里改青州又快快不肯去曰我何罪置我瘠土文皇不悅皇太子力解得暫畱京師又請得天策衛爲護衛曰唐太宗天策上將吾得之豈偶然又請益兩護衛曰我英武豈不類秦王世民乎

六月封哈密阿克帖木兒爲忠順王

哈密古伊吾廬地在燬墩北大磧外西北羗胡往來要路也元封忽納失里爲威武王已而改封肅王卒弟阿克帖木兒嗣洪武時置甘州五衛於張掖肅州衛於酒

泉涼州衛於武威西寧衛於湟中又置山丹永昌鎮
莊浪四衛高臺鎮夷古浪三千戶所自陝西蘭州渡河
千五百里至肅州肅州西七十里爲嘉峪關文皇初設
關外七衛曰哈密曰安定曰阿端曰赤斤蒙古曰曲先
白罕東曰罕東左七衛皆在嘉峪關西哈密又在六衛
西東去肅州西去吐魯番各千五百里北至瓦剌數百
里至是改封安克帖木兒爲忠順王以頭目馬哈麻火
只等爲指揮等官分其衆居苦峪城

文華寶鑑成

先是命侍臣輯自古以來嘉言善行有益於天子者爲
書以授太子至是書成名文華寶鑑上顧解縉等曰

朕皇考訓戒太子嘗集經傳格言爲書名儲君昭鑑錄朕此書稍充廣之昔秦始皇教太子以法律晉元帝授太子以非聖之書帝王之道廢而不講所以速亡朕此書皆大經大法卿等兼輔東宮從容閒暇亦當以此爲說庶幾成其德業他日不失爲守成令主

朝鮮國王李芳遠遣使送耕牛萬頭至遼東

先是上欲廣屯田於遼東命禮部遣人徵牛於朝鮮至是送至命戶部每一頭酬絹一疋布四疋仍賜其王文綺表裏各百疋勅遼東都司以牛分給屯田

命太子少師姚廣孝等賑濟蘇湖

上諭之曰人君一衣一食皆民所措民窮無衣食君豈

可不恤君父也民子也爲子當孝爲父當慈冬盡其道
爾卿往體朕此心不可爲國惜費蓋散財得民仁者之
政也

秋七月山東郡縣野蠶成繭禮部請賀不許

禮部尚書李奎剛奏今歲山東郡縣野蠶成繭綿絲進
獻請百官表賀上曰野蠶成繭使徧於山東之地亦不
過衣被一方而未及於天下朕之心必天下之民皆飽
暖而無飢寒方可爲朕賀也今且止之

八月安南故王孫陳天平來朝

老撾軍民宜尉使刁緣歹遣使護前安南王孫陳天平
來朝奏曰臣天平前安南王恒之孫天明之子日隆弟

也。日燿恭遇天朝。率先歸順。

太祖高皇帝封爲安南

王。賜之章印。在位二年而卒。其弟嗽立。亦止二年。子晚繼之。賊臣黎季犛當國。擅作威福。晚稍欲抑損季犛。弑之。而立晚之子顯。國之大權盡出季犛。與其子蒼左右。前後皆其逆黨。顯惟拱手而已。未幾復弑顯。而立顯子矣。蒙然幼穉。尚在襁褓。季犛父子乃大殺陳氏宗族。并弑弑之。而取其位。更姓名胡一元。子曰胡奎。爲大虞皇帝。紀元。天聖臣以先被棄斥。越在外方。季犛父子志圖篡奪。臣幸以遠外見遺臣之僚佐。激於忠義。推臣爲主。以討賊復讐。方議招軍。而賊兵見逼。倉皇出走。左右散亡。逆黨窮迫。遣兵四索。臣竄伏窮荒。捫拾自給。飢餓困

貶萬死一生久之度其勢且少息稍稍間行艱難跋涉以遠老櫬然時老櫬多事不暇顧臣瞻望朝廷遠隔萬里無所控告屢欲自絕苟且畱存延引歲月忽讀詔書知皇上入正大統率由舊章臣心欣忭有所依歸又以抱疾積久至于今年始獲躬覩天顏伏念先臣受命太祖高皇帝世守安南恭修職貢豈謂此賊造逆滔天悖慢聖明蔑棄禮法累行弑逆遂成篡奪陳氏宗屬橫被殘夷所存者惟臣而已臣與此賊不共戴天伏望聖恩俯垂矜憫因叩頭流涕又言賊臣黎季犛已老詭謀逆計多出黎蒼攻劫占城欲使臣屬又侵掠思明府奪其土地究其本心實欲抗衡上國暴征橫斂酷法嚴刑百

姓愁慙如蹈水火臣之祖宗世尚寬厚今國人嗷嗷頗見思憶陛下德配天地仁育四海一物失所心有未安伐罪吊民興滅繼絕此遠夷之望臣之大願也上憐而納之命有司賜居第月給其廩安南故陪臣裴伯耆來告急奏曰臣世事安南陳氏祖父皆爲執政大夫死於國事臣自少事國王受爵五品後隸武節侯陳竭真爲裨將洪武三十二年代竭真領兵出東海禦寇而奸臣黎季犛父子弑主篡位屠害忠良滅族以百數臣兄弟妻子亦被收戮遣人捕臣欲加菹醢臣聞變遁逃轉入山林深居窮僻與猿狖雜處耿耿忠誠鬱抑無告近聞皇上入蒞大寶統正萬方敢瀝膽披肝請滅

此賊履險乘危得至境上與商人負任而至今年四月
到恩明府接送幸親天日臣切惟奸臣黎季犛乃故經
略使黎國老之子世事陳氏叨竊寵榮及其子蒼亦忝
貴仕一旦得志遂成弑奪改姓名胡一元子曰胡奎偕
號改元不恭朝命肆虐下民百姓含冤呼天叩地忠臣
良士疾首痛心臣義激于中上干天聽願廣一視之仁
哀無辜之衆興弔伐之師隆繼絕之義臣得負弩矢前
進導揚天威忠義之徒必當雲合響應擒滅此賊剪除
奸兇復立陳氏子孫使主此土則區區遠夷仰戴聖德
恭修職貢永作外藩臣不才竊效申包胥所爲敢以死
請伏望 陛下哀矜 上憫之命有司給衣食

九月暹番船漂泊海岸命導之去

福建布政司奏有番船漂泊海岸詢之是暹國遣使
與琉球通好已籍記船物請命上謂李至剛等曰暹
邏與琉球修好是番邦美事船漂至此正宜嘉恤豈可
利其物而籍之鄉有善人猶能援人於危况朝廷統御
天下哉其令布政司舟壞者修理之食者給粟俟有便
風其人欲歸或往琉球導之去

周王橐來朝獻駒虞

周王橐來朝且獻駒虞百僚稱賀上謂侍臣曰祥瑞
之來易令人驕是以古之明王皆遇祥自警未嘗因祥
自怠警怠者國之安危繫焉駒虞若果爲祥在朕更當

加慎。是日宴周王於華蓋殿。賜其從官宴於中右門。

冬十月勅諭甘肅總兵官宗晟盡心邊務。

御史有言甘肅總兵官宗晟擅竊威權事多專制。上諭侍臣曰任事不專則不能成功。況大將受邊寄豈可盡拘文法。今當明與晟言使之釋疑。勅晟曰前者御史言卿專擅此言官欲舉其職。夫爲將不專則功不立。朕旣付卿以閫外之寄事有便宜卽行而後聞自古明君任將率用此道。忠臣事君亦在推誠。朕知卿有素委以重任。彼雖有言卿勿置意但盡心邊務以副朕懷。御馬監索白象食穀不許。

戶部尚書郁新言御馬監索白象食穀。上曰白象何

補實用乃欲奪民食以飼之此古人所謂率獸食人者勿聽。

命法司奉天征討官有罪論如律

鄭賜等奏奉天征討官有以罪繫獄者請論功定議

上曰朝廷大公至正之道有功則賞有過則刑刑賞者治天下之大法不以功掩過不以私廢公此輩征討之功既酬以爵賞今有犯而不罪是縱惡也何以治天下其論如律

山西民請采五色石斥之

通政使趙彝奏山西民言介休縣出五色石可爲器用上曰此僥覲小人不可聽數年軍餉災荒百姓困苦未得

寧息。今又可以此重困之乎。官府求一物。則百姓受一害。況此石。飢不可食。寒不可衣。累民何爲。命急斥之。

十一月設天津衛。

上以直沽海運商船往來之衝。宜設軍衛。且海口田土膏腴。命調緣海諸衛軍士屯守。

鬼赤力馬哈木。雖殺遣人貢馬。

是月鬼力赤阿魯台。與瓦剌馬哈木戰大敗。已而馬哈木阿魯台。皆遣人入貢。而阿魯台寇灰溝村。黃甫川如故。

十二月中官私役工匠。命錦衣衛執治之。

上聞中官於應天府私取工匠役之。召府尹向寶等責。

曰爾職牧民當體國家愛民之意官禁使令之人汝何畏而輒聽其役民汝爲京尹朝夕在朕左右尚畏人如此若遠外小官當如何今姑宥爾若復蹈前非必誅以役工匠中官命錦衣衛執而治之

令臨邊衛所軍犯徒流者仍留原衛戍守

巡按山西御史張翥言山西行都司所屬地方切近沙漠軍衛實則勇不敢犯比軍人徒流罪者悉徙興州屯戍恐邊衛軍士國易逃難必多故犯以求遷徙則隊伍日減邊備不足乞令臨邊衛所軍人犯徒流罪止從等科斷仍留原衛戍守從之

安南遣使賀正旦

安南賀正旦使者至。上令禮部出陳天平見之。使者感其故王孫也。皆錯愕下拜。有感泣者。裴伯者亦責使者以大義。皆惶恐不能對。上聞之。謂侍臣曰。安南明矣。初云陳氏已絕。彼爲其甥。權理國事。請襲王封。朕固疑之。及下詢其陪臣父老。皆對朕謂陳氏以好得國。今在以甥襲之。於理亦可。乃下詔封之。孰知其弑主篡位。暴虐國人。攻奪隣境。此天地鬼神所不容也。其臣民共爲蒙蔽。是一國皆罪人也。如何可容。

禁錮李景隆

周王言李景隆建文時嘗至邸。卽訊索賂。群臣又劾景隆與弟增收匿亡命。命革爵沒其家下獄。

乙酉三年春正月免順天永平保定田租二年○命選新進士就文淵閣進學。

初上命解縉等選新進士才識英敏者俾就文淵閣進學。至是縉等選修撰曾榮編修周述周孟簡庶吉士楊相劉子欽彭汝器王英王直余鼎章敞王訓柴廣敬王道熊直陳敬宗沈升洪順章朴余學夔羅汝敬盧翰湯流李時勉段民倪維哲袁添祿吳紳楊勉二十八人入見進士周忱自陳年少亦願進學。上喜曰有志之士也命增忱爲二十九人。

是御史李椅行人王樞劾問安南胡奎篡奪陳氏之故二月行部尚書雜僉伏誅

左都御史陳瑛劾奏雜僉貪婪暴虐擅作威福縱其妻
於所部郡縣逼索財物遂並處死。

改黃福爲北京行部尚書。宋禮工部尚書。

左都御史陳瑛劾福不恤工匠故改行部禮爲工部時
營北京取材川蜀伐山通道深入險阻文皇下勅嘉其
勞績。

三月哈密安克帖木兒卒脫脫嗣封忠順王。

安克帖木兒卒無子兄子脫脫先是俘蠻夷邸朝議哈
密爲西域入貢孔道宜釋脫脫令嗣王乃賜金印誥命
玉帶文綺遣使送還令察諸番向背凡諸番貢物表文
譯上之。

保定侯孟善市馬開原○夏四月僉都御史俞士吉冊封日本國王賜印誥詔名其國之鎮山曰壽安鎮國山六月詔革楚府鐵牌

湖廣都司言楚府鐵牌一面遇夜差人出城驗此開門上以書諭之曰國家舊制在外各城門鎖鑰皆屬都司軍衛今王府自出此牌禮非所宜卽宜停革以副倚重之意

安南胡奎遣使阮景真隨御史李椅上表謝罪遣陳天平歸國仍命行人聶聰齎勅諭胡奎俱行○改江西道監察御史汪俊民爲刑科給事中

巡按廣東御史汪俊民言瓊州府周圍皆海中有黎母

等山皆生熟黎人所居。賊亡匿叛。侵擾居民。今朝廷遣使招諭。臣愚以爲黎性頑狠。不易信從。又山水峻惡。風氣亦異。中國之人。罹其瘴毒。鮮能全活。臣訪得宜倫縣熟黎峒首王賢祐。舊嘗奉命招諭黎民。信從歸化者多。其服習水土。不畏瘴癘。臣請仍詔賢祐至京。量授以官。俾招諭未服黎人。戒約諸峒。無納逋逃。其熟黎則令隨產納稅。一切差徭。悉與蠲免。生黎歸化者。免其產稅三年。峒首則量所招名數多寡。授以職事。如此庶幾黎民順服。從之。尋改爲刑科拾事中。

秋八月。戶部尚書郁新卒。命夏原吉還掌部事。九月。命設海外諸蕃朝貢館驛。

上以海外諸番朝貢之使益多。命於福建浙江廣東市船提舉司各設驛以館之。福建曰來遠浙江曰安遠廣東曰懷安各置驛丞一員。

禮部尚書李至剛罷。改刑部尚書鄭賜爲禮部尚書。陞真定知府呂震爲刑部尚書。○冬十月駙馬都尉梅殷暴卒。先是左都御史陳瑛劾殷招藏亡命私匿胡人與女秀才劉氏朋奸詛說幾得罪。至是殷入朝。雖家都督譚深指揮趙賊令人擠殷於簷橋下。賊又誣殷自投水死。都督許成發其事。上怒罪深賊二人對曰。此上命也。奈何殺臣。上大怒立命力士持金瓜落二人齒斬之。謚殷曰榮定。初公主嘗貽書阻靖難兵。文皇不答。兵至淮。

文皇與公主書言興兵不得已令公主遷居太平門外勿懼兵禍公主亦不答公主高皇后長女也殷既歿公主牽文皇衣大哭問駙馬安在文皇笑曰爲公主跡踪賊無自苦公主謹護二子順昌景福文皇以順昌爲中府都督景福旗手衛指揮僉事賜手書二甥曰朕不念爾母爾安得至今日二甥後改孝陵衛指揮使

十二月安南胡查復遣阮景真隨行人聶聰來貢請迎還陳天平○勅行人聶聰送陳天平歸國命征南副將軍黃中呂殺率兵護行○命兵部榜諭北邊官民西番馬至必與好茶巡按御史采察以聞

丙戌四年春正月河南南陽皂君山盜起命豐城侯李彬

新城侯張輔討平之。○二月命趙王高燧居守北京。

三月帝視太學謁先師。

勅禮部曰朕惟孔子帝王之師也帝王爲生民之主孔子立生民之道三綱五常之禮治天下之大經大法皆孔子明之以教萬世天下不可無孔子之道朕皇考太祖聖神文武欽明啓運俊德成功統天大孝高皇帝膺君師億兆之任正中夏文明禮樂之舊渡江之初首建太學親祀孔子御筵講書守帝王之心法繼聖賢之道學集其大成以臻至治朕承鴻業惟皇考之成憲是遵今春時和當躬詣太學如皇考故事稱朕崇儒重道治安天下之意。

賜進士林環等二百一十九人及第出身有差○安南李
犛伏兵芹站弑其故主天平害我使人

黃中等以兵五千護送陳天平至丘溫胡奎遣陪臣黃
晦卿等以原領迎候及牛酒犒師晦卿及諸從者見天
平皆拜舞踴躍中問胡奎不至何也晦卿曰屬有微疾
中遣晦卿還促奎且遣騎覘之往來皆無所見而迎者
壺漿相續於道中以爲實遂徑進度隘留雞陵二關將
至芹站山路險峻林木蒙密軍行不得成列且遇雨潦
忽伏發大呼鼓噪動山谷遂殺天平行人聾聰亦遇害
中等亟整兵擊之寇已斬絕橋道不得前中等引兵還
奏聞上大怒謂成國公朱能等曰最爾小醜罪惡滔

天猶敢潛伏奸謀肆毒如此朕推誠容納乃爲所欺此而不誅兵則何用能等皆曰逆賊罪大天地不容上遂決意興師

書諭鬼力赤可汗通好復不報○夏四月命禮部遣使求遺書○勅鎮守雲南西平侯沐晟調兵南伐

勅曰比遣都督黃中等送安南王孫陳天平還國中等輕視黎賊率意而進以至辱國今興師南伐勅四川等都司選卒七萬再勅蜀王於成都三護衛選卒五千聽爾調遣大軍合用糧儲須預爲會計規畫輸運不可後期賜白金五百兩

徵黃中呂毅赴京以送陳天平失律也○五月廢齊王稱

爲庶人安置廬州

齊王搏之國 上面諭曰無忘患難搏至國復驕縱陰蓄亡命養刺客偕帝號爲詛記輒用護衛兵守青州府城北門自廣智門外接園圍築墻垣截往來守吏不得登城夜巡李珙曾名深等上變告搏匿其人城口上賜書索珙及諭搏改過是時周王橐上書悔罪上封橐書示搏搏來朝面謝廷臣劾搏罪請論如法搏厲聲曰奸臣喋喋無乃效建文時殺我會當盡斫此輩 上聞之益怒留搏京邸奪其護衛誅指揮柴真等罷遣罪斥齊府諸僚盡出王繫囚及諸不法器械群臣又以教授柴垣等不正救請罪之 上曰齊王凶悖縱恣性習使

然朕與王君臣兄弟出之田園寵以爵祿恩禮渥洽誠心溫詞開諭至六七不悛教授奈王何況垣等皆先自歸發其事可勿論博留京益有怨言乃召其諸子至京父子並奪爵爲庶人安置廬州

六月己未朔日有食之○秋七月召北京儒士武周文爲翰林侍講學士

召北京儒士武周文至命爲翰林侍講學士以其老賜勅致仕上諭胡廣等曰朕守藩時王府官亦有三二人知易者然皆不若周文切實但所言亦有拘滯處蓋易道在變通不失其正古人隨時從道之說最得要領唯在虛心以玩之耳又曰爲學不可不知易只內君子

外小人一語人君用之功效不小

辛卯命成國公朱能等分道討安南

七月辛卯以成國公朱能爲征夷大將軍總兵官西平侯沐晟新城侯張輔爲左右副將軍豐城侯李彬雲陽伯陳旭爲左右叅將大將軍右叅將及清遠伯陳友統神機將軍程寬朱貴等遊擊將軍毛八丹朱廣王恕等橫海將軍魯麟王王商鵬等鷹揚將軍呂毅朱吳江浩方政等驍騎將軍朱榮金銘吳旺劉劄出等二十五將軍以兩京畿荆湖閩浙廣東西兵出廣西憑祥左副將軍左叅將統都指揮陳睂盧旺等以巴蜀建昌雲貴兵出雲南蒙自兵部尚書劉儁叅贊戎務行部尚書黃福

大理卿陳洽轉餉征交趾 上幸龍江禡祭誓衆曰
賊父子必獲無赦脅從必釋毋養亂毋玩寇毋毀廬墓
毋害稼穡毋恣取貨財毋掠人妻女毋殺降有一於此
雖功不宥毋冒險肆行毋貪利輕進罪人旣得即擇立
陳氏子孫賢者撫治一方班師告廟揚功名於無窮
命平江伯陳瑄兼理江淮衛轉運

永樂初北京軍儲不足以瑄充總兵官都督宣信副之
帥舟師海運歲米百萬石建百萬倉於直沽尹兒灣城
天津衛籍兵萬人戍守至是令江南糧一由海運一由
淮河入黃河至陽武陸運至衛輝仍由衛河入白河至
通州是爲海陸兼運也

以朱濟爲行部尚書○閏七月文武羣臣請建北京宮殿
九月設陝西甘肅花馬寺○冬十月征夷大將軍總兵官
成國公朱能卒於龍川以張輔爲征夷大將軍

十月張輔兵渡坡壘開傳檄數黎賊二十罪遂入鷄陵
關沐晟兵至白鶴江能卒以輔代之晟兵遂奪宣江進
次沱江輔兵渡沱江合兵渡富良江進克多邦城焚賊
西都賊走入海輔駐兵交州晟追賊至木九江

十二月甌寧王元熾暴卒

邱中忽火起驚仆地卒

丁亥五年春正月張輔沐晟合兵破籌江柵○二月出解
縉爲廣西右叅議

上初寵縉信用賞賚與六卿等時儲位未定上密詢
縉縉稱世子仁孝天下歸心以孽奪宗自古致亂上
不應又頽首曰好聖孫上曰已喻逾年冊世子爲太
子進縉翰林學士兼左春坊大學士初議頗洩丘福等
遂謗縉洩禁中語高煦大恨欲殺縉未幾用兵交趾縉
力言交趾古羈縻國通正朔時賓貢而已得其地不足
郡縣上遂踈縉出爲廣西叅議

命編直隸浙江諸郡私披剝爲僧者千八百人爲軍發戍
遼東甘肅○夏四月皇長孫出閣就學○五月張輔沐晟
追賊出奇羅海口擒黎倉及其父季拜檻送京師

輔晟敗賊於富良江賊走又定都督僉事柳升率舟師

追賊敗之得賊船三百。賊遁入海。輔晟乘勝追之。升引兵出奇羅海口。賊敗。卒王柴胡等七人擒李瑋。又李保等十人擒其子澄。又安南人武如卿等擒僞大虞皇帝蒼。太子蒞偽將相王侯柱國黎季貌等俱檻送京師。六月置交趾都布按三司。以都督呂毅掌都司事。尚書黃福兼管布按二司事。

詔曰。朕祇奉皇圖。恪遵成憲。弘敷至治。期四海之樂康。永保太和。俾萬物之咸遂。夙夜兢業。弗敢怠遑。仰惟皇考太祖高皇帝。混一天下。懷柔遠人。安南國陳日燾慕義嚮風。率先職貢。嘉其勤悃。頒賜鴻恩。封爲安南王。長有其土。子孫世襲。與國咸休。比其賊臣黎季犛。子黎

犬豕蓄虎狼之心。竟爲吞噬之舉。殺其國主。戕其閭宗。
覃被陪臣。盡罹慘酷。指冠殺戮。荼毒生民。鷄犬弗寧。怨
聲載道。狐疑狙狡。鼠黠狼貪。詭異姓名。爲胡一元子。胡
奎隱蔽其實。矯稱陳甥。誑言陳氏絕嗣。請求詔襲王封。
朕念國人無所統屬。不逆其詐。聽信所云。倖成奸譎之
謀。輒逞跳梁之念。全無忌憚。靡惡不爲。自以爲聖優於
三皇。德高於五帝。以文武爲不足法。以周孔爲不足師。
毀孟子爲盜儒。謗程朱爲剽竊。欺聖欺天。無倫無理。僭
國號曰大虞。竊紀年爲紹聖。稱爲兩宮皇帝。冒用朝廷
禮儀。非惟恣橫於偏方。實欲抗衡於上國。倖奉正朔。受
頒曆而焚之。招納逋逃。問追索而隱匿。朝貢之禮不行。

兇暴之情益肆。涵淹卯育。祗有圖大之心。鋒螭斧。動侵陵之勢。覬覦南詔。窺視廣西。據思明府之數州。侵陵遠州之七寨。劫朝廷之命吏。供彼家之歲令。擄其女子。以備兇鉗。陵其人民。以蹈湯火。欺占城之孱主。伐其國。以遭喪奪。其土疆要其貢賦。逼受僞印冠服。令其從已。背朝屢被殘殃。數來告急。朕矜其愚昧。未終絕之。特遣使臣曉以禍福。啓其自新之路。開其向善之門。諄切再三。俾其改悟。益見冥頑狠愎。稔惡弗悛。未幾安南王孫奔竄來京。訴陳其事。黎賊一聞。謬來効款。求釋誣罔之罪。迎立陳氏之孫。示彼至公。曾何芥蒂。卽遣送歸國。黎賊乃伏兵要殺於途。并殺朝使。朕遣人賜占城禮物。

又殺使臣而奪之。朝臣始請加兵致討。謂昔苗氏逆命。禹有徂征之兵。葛伯仇餉。湯有侯蘇之旅。茲兇豎積惡。如山四海之所不容。神人之所憤怒。此而可紓。孰爲懲戒。朕以五兵戢衆之日。正萬國乂安之時。獨茲叛夷。妄干天憲。蛇虺之毒。無厭生靈之害。曷已。與言及此。盡然傷懷。志在弔民。豈忍窮武。寔不得已。告于神祖。聿興問罪之師。爰舉九伐之典。用除殘暴。以解倒懸。撲兇焰於方張。與陳氏於既絕。乃命征夷將軍成國公朱能等。率偏師帶甲八十萬騎。以討之。特勅將士。其臨陣來敵者。殺無赦。其來降。悉宥之。師渡富良江。賊率衆號七百萬。來拒戰。尚逞怒蛙之勇。以嬰霆擊之威。兵刃纔交。勢即

披靡我師。輓之如摧。枯拉朽。斬首百萬級。直擣東都。遂平西都。四郊無結草之固。前徒有倒戈之師。黎賊孽孽。卽時殄滅。其有投兵乞命者。卽釋不誅。所至秋毫無犯。市不易肆。人民安堵。徧求陳氏子孫立之。其國官吏耆老人等。累稱爲黎賊滅盡。無可繼承。陳請安南本古交州。爲中國郡縣。淪汚夷習。于茲有年。今幸遇汎掃。攬擒剷除。蕪穢願復古州縣。與民更新。庶再覩華夏之淳風。復見禮樂之盛治。俯徇輿情。從其所請。置交趾都指揮使司。交趾承宣布政使司。按察司。及軍民衙門。設官分理。廓清滂徼之妖氛。變革遐邦之陋俗。廣施一視之仁。永樂太平之治。布告中外。咸使聞知。

改大理卿陳洽爲吏部左侍郎

遣郎中張宗周等以吏部勘合二千道付陳洽凡當授官必與張輔沐晟劉儁計議量才授職給與勘合

勅張輔沐晟劉儁訪求交趾人才禮送赴京擢用○乙卯皇后徐氏崩○秋八月設海道都漕運使司於蘇州太倉城

九月季曆昏及其僞將相下獄赦澄蒨等令有司衣食之陞柴胡等指揮僉事千戶

張輔沐晟等遣都督柳升等齎露布檻送黎季犛黎蒼等獻俘至京上御奉天門受之文武群臣偕兵部侍郎方賓讀露布至弒主篡國僭號紀元等語上使問季

堯父子曰此爲人臣之道乎季堯父子不能對詔以季
堯及子蒼及其僞將相胡杜等悉付獄赦其子孫澄甫
等命有司給衣食

冬十月辛巳朔日有食之○初設按察司屯田僉事

十一月令內閣輔臣考滿勿改外任○永樂大典書成

先是上諭翰林臣曰天下古今事物散載諸書篇帙浩
繁不易檢閱朕欲悉采各書所載事物類聚之而統之
以韻庶幾考索之便如探囊取物觀廣韻玉篇二書事
雖有統而采擇不廣記載大略爾等其如朕志凡書契
以來經史子集百家之書至於天文地志陰陽醫卜僧
道六藝之言備輯爲一書毋厭浩繁至是書成凡二萬

二千九百卷一萬一千一百本賜名永樂大典上親
製序文

十二月撒馬兒罕頭目哈里遣人送給事中傅安郭驥還
撒馬兒罕漢屬賓也俗尚回回教洪武二十年國主帖
木兒遣回回滿刺哈非思貢駝馬自是表貢不絕二十
八年遣兵科給事中傅安郭驥等使西域留撒馬兒罕
至是頭目哈里令虎反達送安等還且貢方物厚賜之
改安等禮科賜衣

賜徐輝祖長子釋迦保名欽令襲魏國公

是年徐輝祖卒年四十上曰輝祖與齊太革罪同宜
論死念中山王平定天下有大功由赦輝祖今輝祖病

死中山王不可無後輝祖長子釋迦保見賜名欽令襲
魏國公遂乞守墓上怒謫居中都

戊子六年春二月定巡狩禮○三月勅諭福建都布按三
司衛所府州縣官

皇帝勅諭福建都司行都司布政司按察司衛所府州
縣所屬軍民衙門官吏軍民急於衣食又有趨事之勞
朕鑒艱難不忘夙夜爾等受國家委任徇祿苟容下民
疾苦恬不經意互相壅蔽一毫不以上聞甚至貪官猾
吏假公營私剝民肥已恣其狼暴流毒無厭督責逋負
連及累歲鞭笞繫繫困迫難勝原爾等之罪以有餘辜
今且寬宥以勉將來其軍民衙門洪武三十五年以前

但有追徵未完稅糧諸色課程鹽草賊罰等項一應係官錢糧物件咸與蠲免以稱朕恤下之意如勅奉行書諭虜酋本雅失里不報

是時鬼力赤棄虜中迎本雅失里北行故再遣鴻臚寺丞劉帖木兒不花等以書諭意言我皇考太祖於元氏子孫存恤保全有來歸者皆令還如遣脫古思帖木兒還爲可汗統率其衆承宗祀南北人所共知也朕之心卽皇考與前古帝王之心爾元氏宗嫡當奉世祀吉凶二途審思之如能幡然來歸加以封爵厚以賜賚俾於近塞擇善地以居惟爾所欲無爲下人所惑徒擁虛名禍機在前有不暇顧亦惟爾所欲仍不報

巡按福建御史趙昇及蘇楊二府進栢檜花瑞皆切責之
巡按福建御史趙昇及布政司按察司奏以栢生花爲
瑞上賜勅切責之蘇州楊州二府言檜花爲瑞上
曰近蘇松諸郡水潦爲災有司往往蔽不以聞昨有奏
栢花爲瑞者已責其欺罔今又言檜花小人之務諛說
也可惡遂降璽書切責之

夏四月己卯朔日有食之○六月交趾總兵官張輔沐晟
等班師還京

交趾總兵官張輔沐晟等旋師至京輔等上交趾地圖
其地東西相距一千七百六十里南北相距二千八百
里上嘉勞之賜輔晟等及諸將宴于中軍都督府旌

軍人賜鈔五錠。己丑吏部尚書蹇義等。同六部尚書奏。新城侯張輔等。平定交趾。建設軍民衙門。總四百七十有二。都司布政司按察司各一。衛十。千戶所二。府十五。州四十一。縣二百八。市舶提舉司一。巡檢司百。稅課司局等衙門九十二。置城池十二所。安撫人民三百一十二萬有奇。命義等曰。爾同禮部。即會議將士功次。陞賞視平雲南例增之。

諭平安南功。進封張輔爲英國公。沐晟爲黔國公。柳升爲安遠伯。餘各爵級銀幣有差。○禮部尚書鄭賜卒。改以爲爲禮部尚書。以都御史劉寬爲刑部尚書。○楊榮丁母憂。○翰林院學士王景卒。

景在洪武中。歷敎諭知州。陞山西叅政。坐事謫雲南。遷
文中。吏部尚書張紱。前任雲南。雅知之。奏陞翰林。待
上卽位。陞學士。時建文君未葬。上詢葬禮。景對宜葬以元
子之禮。雖隱忍以終其身。猶爲不忘故主者云。

諭廷臣水旱修省擇賢守令

上御奉天門。顧廷臣曰。近日郡縣數奏水旱。朕甚不寧。
右通政馬麟對曰。水旱出於天數。堯湯之世所不免。今
聞一二處有之。不至大害。上曰。爾此言。不學故也。洪
範恒雨恒陽。皆本於人事。不修。顧尚書方賓等曰。朕與
卿等皆當修省。更須擇賢守令。守令賢則下民安。民安
於下。則天應於上。麟言貴識天人感應之理。麟慚而退。

諭兵部東北諸胡留居快活自在二城欲去勿阻

上謂兵部曰朕即位以來東北諸胡來朝者多願留居京師以南土炎熱特命於開原置快活自在二城居之俾部落自相統屬各安生聚近聞多有思鄉土及欲省親戚去者爾即以朕意榜示之有欲去者令明言鎮守官勿阻之

秋八月交趾簡定反以沐晟爲征夷將軍劉雋叅贊軍務帥師討之○詔明年二月巡北京

詔曰成周營洛肇啓二都有虞勤民尤重巡省朕君臨天下祇率彝典統極之初已陞順天府爲北京今四海清寧萬民安業國家無事首方以時將以明年二月巡

幸北京命皇太子監國朕所經遠去處荒王止觀王拔
一程迎接軍民衙門官吏人等於境內朝見非經過去
處毋得出境道路一切飲食供給之費皆已有備不煩
於民諸司毋得有所進獻科擾勞衆布告中外咸使知
聞

冬十月乙亥朔日有食之○十一月淳泥國王麻那惹加
加那來朝卒○十二月沐晟及簡定戰于生厥江敗績尚
書劉儁都督呂毅交趾叅政劉昱歿之○以英國公張輔
充總兵官帥師討簡定○瓦剌攻破鬼力赤阿魯台立本
雅失里爲可汗

己丑七年春正月遣太監鄭和航海通西南夷

文皇入金川門時宮中火發或傳建文帝崩或云遜去
諸舊臣多從建文帝去者文皇益疑大戮建文諸臣遣
胡濙等巡天下以訪異人爲名徧行郡縣察人心及建
文帝安在時又傳建文帝在滇南胡濙以故在楚湖南
最久後又傳建文帝蹈海去乃分遣內臣鄂和數輩浮
海下西洋因充冊封使封滿剌加國王西利入兒辣剌
爲滿剌加王

楊榮陞辭留北巡扈行○勅榮義黃洲楊士奇輔皇子監
國○賜皇太子聖學心法

上出一書示胡廣等曰朕因政學求聖賢之言若執中
建極之類切于修身齊家治國平天下者今已成書御

等試觀之。廣等隨畢奏曰。帝王道德之要。備載于此。因名曰聖學心法。命司禮監刊印。上諭黃淮楊士奇曰。東宮向日朕問講官。向日說何書。對曰。論語。君子小人和同章。因問何以君子難進易退。小人則易進難退。對曰。小人逞才而無耻。君子守道而無欲。又問何曰。小人之勢常勝。對曰。此係上人之好惡。如明主在上。必君子勝矣。又問明主在上。都不用小入乎。曰。小人果有才。亦不可盡棄。須常警飭之。不使有過可也。朕甚喜其學問有進。爾等其盡心輔之。

茹瑺下錦衣衛獄。

谷王穗開金川門迎靖難兵。文皇卽位。賜穗七奏衛士。

三百及金銀鈔馬加祿歲三千石官其護衛指揮僉事張興爲都督僉事儀衛正張成爲指揮使已而改封長沙既至國驕橫不遵藩職時忠誠伯茹瑄請告歸道出長沙不謁谷王王以爲言時方重藩王禮左都御史陳瑛遂劾瑄違禮訓谷王又開門有功上重違王意乃下瑄錦衣獄卒獄中穗益無忌憚矣

二月帝發京師○三月帝至北京○平安暴卒

平安力舉數百斤果勇善戰陳亨王真皆驍將並爲安所殺靈壁戰敗安就執靖難諸將皆喜或請殺安文皇惜其才勇釋縛簡銳卒護送北平且令郭資善視之已而掌北平都司事進北京行後府都督僉事至是大安

四集徐議進擊。否則墜虜計。福不從。又令虜尚書爲鄉導。率衆直薄虜營。相持二日。每戰虜輒佯敗。引我兵深入。福意銳欲乘虜。李遠力言虜示弱給我。退則乘我。進則伏我。惟結營自固。晝揚旗伐鼓。出奇兵與挑戰。夜多燃炬鳴炮。以張軍聲。勞困虜。使其測不二日。我軍畢至。併力奮擊。必大捷。否亦可全師而還。將軍奈何不慮此。王聰亦力阻。福皆不從。欲遣火真使虜詐求和。解而率精騎劫虜。真猶豫未決。福厲聲曰。違命者斬。即上馬先馳。麾士卒控馬者皆泣下。諸將見元帥去不得已。從行不數里。虜伏四起。奄至圍我。遠聰率五百騎突虜陣。斬虜數百人。聰戰死。遠馬蹶與福真忠皆被執。沒虜中。

上聞敗大怒諭東宮明春朕且親征雪耻

楊榮還復命仍遣持節至亦集乃軍中封何福爲寧遠侯
冬十二月張輔獲簡定檻送京師伏誅

八月張輔敗賊于鹹子關九月又敗之于太平海口十
月李擴稱故王後請封輔不聽進兵至于清化十一月
獲簡定檻送至京師伏誅

庚寅八年春正月召張輔還命沐晟節制諸軍雲陽伯陳
旭副之討李擴○二月帝親征本雅失里皇長孫留守北
京夏原吉兼理行在部院事○三月大閱於鳴鑾戍○永
昌韃官叛總兵都督費瑄參贊軍務刑部尚書劉觀討平
之○夏五月帝追虜至于斡難河擊敗之本雅失里遁○

見安。忽問曰：「安乃尚無恙，安懼遂自經。」

誅趙王長史顧晟

趙王高燧居守北京，信用邪說，恣行不法。上聞之，大怒，誅其長史顧晟。祔王衣冠，擇國子司業趙亨、道童子莊爲長史。二人能輔導，王稍稍改行。

夏四月，遣給事中郭襲諭本雅失里，驥不屈死之。○閏四月，以方賓爲兵部尚書。○五月，作壽陵於昌平，封其山爲天壽山，置邊城，調兵勘合。

上以邊戍調遣，止憑勅書，慮或有詐，乃以勇敢鋒銳神奇精壯，強毅克勝，英雄威猛十六字編爲勘合。

安南反賊簡定稱上皇，立陳季擴爲大越皇帝，改元重光。

○封瓦剌哈木爲順寧王。太平賢義王把禿孛羅安樂王
賜之誥印。○秋七月以洪國公丘福爲征虜大將軍。武城
侯王聰同安侯火真爲左右副將軍。靖安侯王忠安平侯
李遠爲左右叅將。率師征本雅失里。○甘肅總兵官何福
奏虜脫脫不花來歸。命楊榮至甘肅受降。○八月征虜兵
至臚胸河。丘福等五將皆敗歿。

丘福出塞率千餘人先至臚胸河南。遇虜遊兵與戰。虜
敗。福遂乘勝渡河。又獲虜間我者尚書一人。福飲之酒。
問本雅失里今安在。虜尚書詐言本雅失里聞兵來北
遁。去此未遠可三十里。福大喜曰。當疾馳擒此虜。時諸
軍未集。衆皆曰。此虜誘我不可信。俟諸軍畢集。遣精騎

六月阿魯台詐降逆戰敗走帝追擊大破之遂班師○秋七月帝至北京○八月寧遠侯何福暴卒

福從征沙漠數違節度羣臣交劾上念福舊人有才略曲赦之已而有怨言左都御史陳瑛又劾福懼自經死追奪侯

長沙妖賊季法良反皇太子命豐城侯李彬討平之○冬十月賜皇長孫務本之訓

上以皇孫生長深宮欲其知稼穡之艱難因巡幸北京命之侍行使歷觀民情風俗及田野農桑勞苦之事且舉太祖創業艱難及往古興亡得失可爲鑒戒者以致飭勵之意書成名務本之訓云

周王請祀太祖於國中。不許。

上問周王構於國中作殿。奉祀太祖高皇帝。賜之書曰。禮支子不祭皇祖。王國廟祀則肇於始封之王。若太祖之祀。朝廷自有宗廟。王今祀於國中。僭矣。孔子曰。祭之以禮。若不得爲而爲之。不可爲孝。王其審禮而行。毋貽物議。

帝發北京○十一月帝至京師○十二月諭吏部風憲官不得用吏

上諭蹇義曰。御史國之耳目。必有學識。達治體。廉正不阿。乃可任之前。以刀筆吏爲之。知利不知義。知刻薄不知大體。前之由吏爲御史者。南吏部悉罷之。繼今風憲

更不得用吏。

交趾李擴遣使胡彥臣請降以爲交趾右布政使復反。
辛卯九年春正月命張輔爲征虜副將軍會征夷將軍沐
晟討交趾李擴。

勅四川廣西江西湖廣雲南貴州六都司安慶等十四
衛發兵二萬四千隨征。

二月勅戒秦王尚炳

勅戒秦王尚炳曰昔周天子遣使賜齊桓公胙且命勿
下拜桓公對曰天威不遠顔咫尺小白敢貪天子之命
無下拜遂下拜登受春秋書以示褒遣使賜晉侯命晉
侯受玉帛使者歸曰晉侯其無後乎成肅公受服於社

不敬劉康公曰成子惰棄其命矣後皆不得其終春秋書以示戒比屢遣人齎符至王國王不出迎但命內豎取入及出見使者又侮慢不一皆王不學之過致王於此者皆長史紀善典儀之失職也其械送京師王自今勉力學問庶幾寡過

命工部尚書宋禮都督周長浚會通河

是年命禮與都督周長修復元會通河自濟寧至臨清三百八十五里置十五閘又浚黃河故道自祥符漁王口至中灤下二十餘里以殺水勢又於寧陽築堤城塹過汶水盡入漕河又疏衛河至海豐太古河入凡四百五十七里於是漕州始大

設監兒干都司置開原馬市○三月賜進士蕭時中等八十四人及第出身有差

永樂七年己丑會試天下舉人取陳燧等八十四人以
上巡北京未廷試至是臨軒親策賜蕭時中等各及第
出身有差。

陳瑛有罪下獄死

初瑛受金錢爲異謀僉事湯宗上變告安置廣西及文
皇卽位召爲副都御史首恨湯宗卽置之死尋陞左都
御史有寵恣意羅織逢迎凡建文諸臣得罪深重瑛實
贊之旣而給事中耿通劾其誣陷李貞中允劉子春劾
其方命廢事皇子皆宥之至是上聞遂下獄死。

命兵部定軍士屯操之制

鎮守大同江陰侯吳高言山西行都司屬衛軍士今屯田者多操練者少請留其半操練以備不虞上諭兵部曰守備固不可單弱若兵食不足亦難與守宜視其地之險夷以定守備之多寡陽和留什之四朔州留什之三蔚州留什之二餘悉令屯種且耕且守以爲定制

夏四月琉球國中山王恩紹遣使貢馬及方物

琉球國中山王恩紹遣使坤宜堪彌等貢馬及方物并以長史程復來見表言其國長史王茂輔翼有年請陞茂爲國相兼長史事又言復本中國饒州人輔臣祖察度四十餘年不懈于職今年八十有一請命致仕還其

鄉從之。陞復爲琉球國相兼左長史。致仕還饒州。茂爲琉球國相兼右長史。仍賜坤宜堪彌等鈔幣遣還。

五月倭寇浙江盤石。○六月太監鄭和襲執錫蘭國王亞烈若奈兒獻俘。釋之。○逮交趾在叅議解縉下錦衣獄。縉出叅議廣西李至剛奏縉怨望。故改交趾八年入奏事。會。上北征。見東宮遂辭去。高煦密疏言縉驕上出塞。輒遠觀儲君徑歸。無人臣禮。上怒。逮縉并至剛下獄。

秋七月張輔沐晟敗賊黨阮帥於月常江。○通政司請治建文時上書有干犯語者。令勿聽。

通政司言黃巖縣民告豪民持建文時土人包葬古所

進楚王書稿與衆聚觀書中有干犯語請法司治之。上曰此必與豪民有怨而欲報之朕初卽位命百司凡建文中上書有干犯語言皆朕未卽位以前事悉毀之有告者勿行今復行之是號令不信矣況天下之主豈當念舊惡如唐之王魏太宗棄宿憾而信任之卒相與成治功帝王之度如海納百川無所不容故能成其大豈可一一追咎往事所告勿聽。

冬十月重修太祖高皇帝實錄○兵科都給事中倪峻請治千戶擅發兵捕盜者令勿問

兵科都給事中倪峻言有內官奏千戶不待朝命輒發兵捕盜者請治其專擅之罪上曰國家養兵正以除

奸衛民境內盜發千戶能率衆捕之使民免於暴橫正是能盡其職若必待奏報而後發兵小則亡逸大則勢張民受害多矣閣豎不達事體爾亦從其言乎千戶無罪峻惶恐而退。

哈密忠順王脫脫卒封免力帖木兒爲忠義王尋卒封孛羅帖木兒爲忠順王○十一月封皇太子嫡長子爲皇太孫冠于華蓋殿○十二月遣使勅諭福餘朵顏泰寧三衛遣指揮木峇哈阿升哥齎勅諭福餘朵顏泰寧三衛頭目昔兀良哈之衆數爲韃靼抄掠不安乃相率歸附誓守臣節我太祖高皇帝矜厥困窮設福餘朵顏泰寧三衛而授爾等官職俾各湏其衆臣屬旣久後竟叛去及

朕即位復遣人來朝朕略其舊過加意撫綏數年以來生聚蕃息朝廷於爾可爲厚矣比者爾等爲本雅失里所脅掠我邊卒又遣苦列兒等紿云市馬實行窺伺狡詐如此罪奚可容今特遣指揮木荅哈等諭意如能悔過即還所掠戍卒仍納馬三千疋姑贖前罪不然發兵誅叛悔將難追

今在內文職七品以上在外五品以上及縣正官各舉賢能廉幹一人聽吏部考驗擢用所保非才舉主連坐○閏十二月阿魯台納款請併女直吐蕃諸部不許

虜酋阿魯台遣使納款且請併女直吐蕃諸部屬其約束上以問侍臣多請許之黃淮獨曰此虜狼子野心

使各爲心則易制若併爲一則難圖矣此舉實其奸計也上顧左右曰黃淮如立高岡無遠不見諸人如處平地所見惟目前耳乃不許阿魯台之請

滿刺加國嗣王拜里迷蘇刺來朝

壬辰十年春正月諭吏部禁諸司造作雜務不許擅差守令正官○三月賜進士馬鐸等一百六人及第出身有差○夏六月勅戶部令郡縣及朝廷遣官不言民艱者逮下

勅戶部曰朕爲天下主所務者安民而已故每歲遣人巡行郡邑惟欲周知歲之豐歉民之休戚近者河南民飢有司不以聞往往有言年穀豐登者若此欺罔獲罪

于天此亦朕任非其人之過其速令河南發粟賑民自
今凡郡縣及朝廷所遣官目擊民艱不言者悉逮下獄
秋七月封錫蘭山國耶巴乃那爲王赦亞烈若奈兒還國
○兵部選韃官教民畜馬

上諭兵部曰朔方多馬固土地所宜亦其人習於畜牧
今韃官閑居者多可選其老成謹厚者令教民畜養於
是兵部奏委都督薛斌吳成等選擇其居永平薊州通
州者就留本處教民居真定定州者更番赴順天府教
民但令教飲飼之宜若孳息不及教者無預
遣中官往詢在外諸司行事

上謂都察院曰比者朕慮在外諸司行事或於民有不

使問遣中官往詢之未嘗有所委任況在外有都布按三司及巡按御史事之當行者所司自行奏請何與中官事比聞中官多有干與有司事者自今不許卽移文中外知之

八月令選直隸應天及北京山東等處民間勇健才藝子弟俾充皇太孫隨從

上謂兵部金忠等曰皇太孫年長有志略朕令其學問之暇兼講武事其遣人往直隸應天及江北鳳陽滁和等府州北京山東山西陝西河南四川湖廣境內選民間子弟年十七至二十勇健有才藝者官給路費廩食送京師俾充隨從

張輔破賊於神投海口○九月瓦剌馬哈木攻破本雅失里立答里巴爲可汗○冬十月命皇太孫演武於方山○命鎮守交趾都督韓觀運廣東糧萬石赴交趾給軍食○張輔破賊於西心江○蘇州嘉定縣寶山成

初平江伯陳瑄言蘇州嘉定瀕海之墟正當江流衝會海舟停泊之所無大山高嶼可以依據漕舟於此或值風濤觸堅膠淺輒致傾覆乞於縣之清浦築土爲山立堠表識從之命有司徵軍夫命瑄督其役仍勅賜農隙爲之至是成方百丈高三十餘丈賜名寶山上親製碑文記之

十一月命楊榮經略甘肅軍務老的罕來降

甘肅守臣宋琬言老的罕叛。數入赤斤蒙古衛爲寇。上以榮曉暢軍。施命至陝西。會豐城侯彬議進兵方略。是冬榮還。言出嘉谷關千里險阨。乏水草。餉道弗能通。又沍寒。士馬疲瘠。不可輒用兵。罷中國。彼小醜當自來歸。上從之。未幾老的罕復降。

尚書宋禮始造淺船

禮以海船造辦太迫。議造淺船五百艘。由會通河運淮。楊徐兗等處歲糧一百萬石以補海運一年之數。

洮州衛鎮撫陳恭上言。侍衛不宜外夷異類之人。不用洮州衛所鎮撫陳恭上言。侍衛防禁宜嚴。外夷異類之人不宜寘左右。玄宗幾喪唐室。徽欽幾絕宋祚。夷狄之

患可爲明鑒。上曰所言禁衛宜嚴甚是。但天之生才。何地無之。爲君用人。但當明其賢否。不當分別彼此。其人果賢。則信任之。不賢。雖至親亦不可用。漢武帝用金日磾。唐太宗用阿史那社爾。蓋知其人之賢也。若玄宗寵任安祿山。致播遷之禍。正是不能知人。宋徽宗自是寵任小人。以致夷狄之禍。不因用夷狄之人也。春秋之法。夷而入於中國。則中國之朕爲天下主。覆載之內。但有賢才。用之不棄。近世胡元。分別彼此。柄用蒙古。鞬鞞而外。漢人南人。以至滅亡。豈非明鑒。禮部尚書呂震請加恭妄言罪。上曰。恭之心。本是忠朝廷。但未深思耳。豈可罪之。朕嘗語卿等言。事之人。或有乖謬。亦當容之。

若加之罪則言路塞而人君無由得聞善道矣爾爲大臣乃有此言亦非忠也

十二月殺浙江按察使周新

周新由鄉舉爲御史彈劾不避權貴擢雲南按察使尋改浙江屬有異政名震一時錦衣指揮紀綱怙寵差千戶往浙緝事作威索賂新捕之千戶遁入京訴綱綱奏新專擅上命官校逮至陛前新抗言曰在內都察院在外按察司朝廷法制官也臣奉法捕惡奈何罪臣上怒命殺之臨刑大呼曰生爲直臣死爲直鬼吾無憾矣上尋悟其寃而惜之

癸巳十一年春正月辛巳朔日有食之免朝賀

先是鴻臚寺奏習正旦賀儀。上召禮部翰林院官問曰：「正旦日食，百官賀禮可免乎？」尚書呂震對曰：「日食與朝賀之時，先後不相妨。侍郎儀智曰：『終是同日，免賀爲當。』楊士奇曰：『日食天變之大者，前代元正日食多不受朝。』宋仁宗時，元旦日食，當弼請罷宴徹樂，呂夷簡不從。弼曰：『萬一契丹行之，爲中國羞。』後有自契丹回者言：『虜是日罷宴。』仁宗深悔，今免賀誠當。」上從之。

勅宥齊黃等遠親，有告勿論。

時翰林庶吉士錢習禮，江西吉水人，與練子寧有姻婭。先是逮治奸黨，習禮偶獲免，而恒爲鄉人所持。習禮不自安，以告學士楊榮。榮以聞，上欣然曰：「使練子

寧今日在此朕固當用之况習禮乎即日下令禁止於是黨禁漸解

二月帝巡幸北京皇太孫從行命蹇義黃淮楊士奇楊瀛輔皇太子監國○始設貴州布政使司以工部侍郎蔣廷瓚爲左布政使

洪武中止設貴州思南思州諸宣慰司管束土民及設都指揮使司鎮守其地既而思南宣慰使田宗鼎與思州宣慰使田琛數相攻殺抗拒朝命乃勅鎮遠侯顧成帥兵擒誅之以思州所轄二十二長官司分設思州新化黎平石阡四府思南所轄十七長官司分設思南鎮遠銅仁烏羅四府而於貴州設布政使司以總之

夏五端午節車駕幸東苑觀擊毬射柳

時文武羣臣四夷朝使及在京耆老聚觀自皇太孫而下諸王大臣以次擊射皇太孫擊射連發皆中上喜命儒臣賦詩賜群臣宴及欽帛有差

曹縣獻駒虞禮官請賀不許

曹縣獻駒虞呂震奏稱上端請率群臣表賀上曰自穀豐登雨暘時若家給人足此爲上瑞駒虞何與民能不必賀震固請上曰大臣之道當務爲國爲民汝能效李沆爲人則善矣震退上顧侍臣曰震可謂不學無術矣

禮部侍郎儀智侍皇太孫講讀

先是上命吏部翰林院簡求老成正大儒者侍皇太孫蹇義楊士奇共舉智。上喜曰得之矣。此人雖老識朝廷大體能直言不阿。向之元正日食日震等皆欲行賀禮。惟此老與楊士奇言免賀。朕從之。智可用。遂令侍太孫授經。智山東高密人。溫重端慤。由教官累遷。今職遇事務。別白是非。不少附會。既而智以年老薦其同鄉訓導戴綸。卽擢爲禮科給事中。侍從授經。

秋七月封韃靼太師阿魯台爲和寧王。

上巡北京。勅阿魯台無以丘福事懷慮。漢呼韓邪。唐阿史那社爾受享顯爵。及子孫爾宜效焉。特賜爾母子金幣諭意。先是阿魯台爲瓦剌攻敗窮蹙。以其妻孥部落。

奔竄而南。保息塞外。於是遣使奉表稱臣。貢駝馬。上曰。虜性黠詐。勢窮來歸。非其本心。然天地覆育。豈有所擇。納其貢使。封爲和寧王。母妻皆封夫人。賜金帛。仍居漠北。

八月遣吏部員外郎陳誠使西域。○冬十一月无刺馬哈木太平把秃孛羅叛寇邊。○十二月張輔沐晟合兵敗賊于愛子江。擒孛羅檻送京師。

甲午十二年春正月丙子朔日有食之。免朝賀。○二月以安遠侯柳升將中軍。寧陽侯陳懋襄城伯李隆豐城侯李彬遂安伯陳英領左右哨瓜山侯王通保定侯梁英都督譚清新寧侯譚忠領左右掖討瓦剌。○三月設隆慶州永

安縣隸北京行部

隆慶古縉雲氏所都之地金置縉山縣元仁宗生於縣東改爲隆慶州國初移其民入關內州遂廢至是以其路當要衝土宜稼穡改爲隆慶州又設永寧縣隸焉以有罪當遷謫者質之

帝發北京親征瓦剌皇太孫從行

先是上謂侍臣曰朕長孫聰明英睿勇智過人今肅清沙漠令侍行俾知用兵之法亦使躬歷行陣見將士勞苦征伐不易又謂胡廣楊榮金幼孜曰每日營中閒暇爾等卽以經史於長孫前講說文事武備不可偏廢

夏五月帝閱武於楊林戍○六月丙寅朔日有食之○車

駕至土刺河答里巴及馬哈木太平把禿孛羅等率衆逆戰大破走之。皇太孫稱賀請還。遂班師。○戊午駐蹕三峰山。和寧王阿魯台遣都督朵兒只魯卜等來朝。命中官王安賞勞之。○己巳車駕次黑山峪。頒詔天下。

詔曰朕祗承天命撫御華夷惟欲乂安咸得其所。瓦剌黠虜僻處窮荒與其醜類歲相讎殺敗亡喪沒存者無幾朕即位之初撫綏存恤授以封爵數年以來憑仗朝廷始得休息。烏合爲群即復驕恣辜恩負德背違信義擅自殺主執殺使臣侵擾邊境犬豕豺狼貪欲無厭覲覲圖大朕不得已躬率六軍以討之師至撒里怯兒之地賊兵來逆戰一鼓而敗之追至土刺河賊首荅里巴

烏哈木太平把克等羅不度智能掃境而來兵刃繞交
如摧枯振朽追奔逐北獸獮禽戮殺其名王以下數千
人斬馘無算餘悉宵遁遂班師而還至飲馬河和寧主
阿魯合遣其酋長率詣軍門來朝推誠待納以安反側
招徠撫輯令回部落嗚呼奉行天威掃腥膻於絕域綏
寧附順重恩惠於遠人俾中國靡轉輸之勞庶邊場無
烽燧之警

己亥駐蹕沙河皇太子遣兵部尚書金忠等迎表至○秋
八月辛丑朔帝至北京○交趾陳季擴等伏誅○九月楊
葛刺國王賽弗丁遣使奉表獻麒麟禮部請賀不許○閏
九月逮黃淮楊士奇楊溥下錦衣獄尋釋士奇

上北征還東宮遣使迎上遲高煦日夜謀奪嫡復造飛語動搖監國并中傷淮等於是坐淮等奉表不敬逮下獄上曰且宥士奇淮在獄中有省愆集溥勵志讀書不輟獄中人止溥曰性命叵測無徒勞苦爲溥應曰朝聞道夕死可矣

冬十月江陰侯吳高以罪免爲民○十一月甲午朔日有食之○降晉王濟熺爲庶人

十一月降晉王濟熺爲庶人俾與長子美圭同守晉恭王墳園仍賜勅諭曰爾謀爲不軌自絕于天自絕于祖宗論爾之罪有不容誅重念恭王手足之義特全爾生令守恭園其閉門念咎杜絕外交改過遷善以保令終

懷之哉。

命胡廣楊榮金幼孜纂修五經四書性理大全

上諭行在學士廣侍講榮幼孜曰五經四書皆聖賢精義要道其傳註之外諸儒議論有發明餘蘊者爾等采其切當之言增附于下其周程張朱諸君子性理之言如太極通書西銘正蒙之類皆六經羽翼然各自爲書未有統會爾等亦別類聚成編務極精備庶幾垂後廣等總其事舉朝臣及教官有文學者同修開館東華門外。

乙未十三年春正月解縉卒獄中

縉卒于獄復籍其家妻子徙遼東至剛不死縉結髮讀

高留心經濟。任事直前。風生電發。早遇聖明。名動天下。
晚罹讒毒。中道夭闕。不盡其用。其重義輕利。遇人憂患。
疾苦。輒隱於心。苟可用力。盡意爲之。篤於故舊。及名賢。
世家之後。喜引拔士類。或謂其泛愛者。終不爲變。襟宇。
濶略。不屑意細故。而表裏洞達。絕崖岸。雖野夫稚子。皆。
樂之。永文翰者。日輻輳。率與之無倦意。或言有不當與。
者。咲曰。雨露豈擇地而施哉。文雄勁奇古。新意疊出。叙。
事高處。逼司馬子長。韓退之。詩豪宕豐贍。似李杜。其教。
學者。恒曰。寧爲有瑕玉。勿作無瑕石。書小楷精絕。行草。
皆佳云。

三月賜進士陳循等三百五十人及第出身有差○禮官

請祀大巖山呼萬歲不許

貴州布政使蔣廷讚言去年北征班師詔至思南府婺川縣大巖山有聲連呼萬歲者三咸謂皇上恩威遠加山川效靈之徵呂震請率群臣上表賀上曰人臣事君當以道阿諛取容非賢人君子所爲呼譟山谷空虛之聲相應理或有之布政司不察以爲祥爾爲國大臣不能辨其非又欲進表媚朕非君子事君之道也

夏四月命征夷將軍英國公張輔鎮守交趾○五月命陳瑄開清江浦始爲支運罷海運

是年陳瑄疏清江浦引水由管家湖入鴨陳口達淮就管家湖築堤亘十里以便引舟浚儀真瓜州通潮繫呂

梁百步二洪石平水勢開泰州白河通大江築高郵湖堤隄內鑿渠亘四十里淮濱作常盈倉五十區貯江南輸稅徐州濟寧臨清德州皆建倉使轉輸議以原坐太倉歲糧蘇州并山東兗州送濟寧倉河南山東送臨清倉各交收浙江并直隸衛分官軍於淮安運至徐州京衛官軍於徐州運至德州山東河南官軍於德州接運至通州名爲支運一年四次河淺膠舟處濱河置舍五百六十八所舍置淺夫俾導舟其可行處緣河隄鑿井樹木以便人行乃增置淺船三千餘艘海運始罷

秋七月誅貪殘守令

皇帝勅諭內外諸司官員朕祗奉天命統承皇考

太祖高皇帝鴻基卽位以來宵衣旰食兢兢業業庶謹
幹濟盡誠竭慮愛恤軍民者有之而聞茸無爲貪污壞
法酷害軍民者有之是致軍民受其毒害困迫不勝蓋
由朕之不明任用非人以致此也且如灤州不才官吏
指以官辦爲由巧立名色以一科百以十科萬所得贓
物各分入已民人受害怨歸朝廷天地鬼神不容致使
敗露已該凌遲處死家產籍沒父母妻子給配今後諸
州官吏敢有仍前貪贓壞法虐害軍民必殺無赦其軍
民今後有合辦差撥稅糧等項各要依期辦納敢有頑
猾過期不行辦納者事發亦皆處以重罪

九月昌平壽陵成○五經四書性理大全成○冬十月吏

部員外郎陳誠使西域還

上使爲西域記所歷凡十七國山川風俗及物產悉備

○

十一月麻祿國進麒麟禮部請賀不許○兵部尚書陳治上言占城國王占巴的賴陰懷二心請兵征討上令遣使賁勅諭之○十二月定牧馬法

上諭行在兵部尚書方賓行太僕寺卿楊砥曰北京論戶養馬其間丁有多寡宜與戶部計議均之宿等議以丁計爲均請十五丁以下養一馬十六丁以上養二馬遷發爲民種田者不論丁七戶養一馬從之

丙申十四年春三月改趙王高燾封國於彰德漢王高煦封國於青州煦辭不許○夏四月祠祭郎中周訥請封禪泰山不許

周訥上言今天下太平四夷賓服民物阜豐請封禪泰山刻石紀功德垂之萬世呂實亦言皇上聖德神功昭格上下宜如訥請上謂袁曰今天下雖無事然水旱疾疫亦間有之朕每聞郡縣上奏未嘗不惕然於心豈敢自謂太平之世且聖經未嘗言封禪唐太宗亦不爲封禪魏徵每以堯舜之事望太宗爾欲處朕於太宗之下亦異乎徵之愛君矣爾當以古人自勉庶幾不忝宗伯之任

錦衣都指揮僉事紀綱伏誅五月壬辰朔日有食之○秋八月作北京西宮九月老人星見勅諭文武羣臣免賀漢王高煦選各衛精壯藝能軍士隨侍勅都督僉事

歐陽青悉還原伍不許稽留○初令監察御史巡鹽○冬十月帝還京師○十一月詔羣臣議營建北京

是月復詔羣臣議營建北京先是車駕至自北京工部奏請擇日興工上以營建事重恐民力不堪乃命文武羣臣復議之於是文武羣臣上疏曰伏惟北京乃聖上龍興之地北枕居庸西峙太行東連山海南俯中原沃壤千里山川形勝足以控四夷制天下誠帝王萬世之都也比年聖駕巡狩萬國來同民物阜成禎祥協應天意人心昭然可見然陛下重於勞民延緩至今臣等切惟宗社大計正陛下當爲之時況今漕運已通儲畜充溢財用具備軍民一心營建之辰天實啓之乞早賜

聖斷勅所司擇日興工以成國家悠久之計以副臣民之望上從之。

召英國公張輔還京以豐城侯李彬鎮守交趾○命監察御史黃宗載巡按交趾○歷代名臣奏議書成

先是上以璽書諭皇太子令翰林儒臣採古名臣如張良對漢高鄧禹對光武諸葛孔明對昭烈董賈劉向谷永陸贄奏疏之類彙錄以便觀覽是年十二月書成進覽刊布。

丁酉十五年春倭奴寇浙江松門金鄉平陽○二月廢谷王穗爲庶人

穗在長沙造戰船弓弩器械招匿亡命習兵法戰陣日

與都指揮張成宦者吳智劉信等謀呼成爲師尚父智信爲國老令公而成智信亦輒應之僞識書以爲識有十八云高皇帝十八子也陰傳播惑衆心製巧燈上獻擇壯士俾入朝架燈又選壯士習音樂與燈並上朝廷欲乘隙爲變奪民田侵公稅殺無罪人踪跡益露長史盧廷綱屢諫不聽誣罪磔殺廷綱張與懼禍及已因奏事北京白其狀上未信與過南京又啓太子曰臣冒死上聞上顧智信願陛下垂聽憶臣言他日得無連坐臣死不朽穗又遣劉信持所爲識致書蜀王爲隱語曰德蒼時不可言桓文之事桓文時亦不可言德蒼之施欲結蜀王爲援蜀王切責不聽已而蜀王子崇寧王悅

燁因詭衆曰往年我開金川門出建文君建文君今在我宮中我將舉事爲建文君復辟事將發曾蜀王上變告上見蜀王疏嘆曰朕待穗厚不宜有此心蜀王忠孝又不宜欺我張都督嘗爲我言我不忍信今果然立命中官持勅諭穗令穗遣燁燁還蜀穗不意使猝至不得已就徵至京入見上以蜀王章示穗穗頓首自伏死罪成國公朱勇等諸大臣廷劾穗曰周辟官蔡漢毅安長皆大義成親陛下縱念穗奈天憲何上曰穗朕弟朕且令諸兄弟議至是楚王楨等各上議曰穗違祖訓謀不軌踪跡甚著大逆無道罪誅不赦上曰諸王奉大義國法固爾吾寧生穗二月削穗及其子賦灼賦

燔爲庶人父子皆安置廬州相繼卒無後

三月改封漢王高煦子樂安遂令之國

上巡北京高煦有異志陰蓄壯士造兵器及皮船教習水戰僭用天子車服挾私繫死無罪官民縱護衛官軍京城內外劫掠起謀益著上聞之大怒促駕南還召高煦視衣冠囚繫西華門內條其罪惡數十事且并之東宮頓首伏地涕泣力救久之削兩護衛誅其左右犯疆徙封樂安促即日行上顧謂東宮及太孫曰樂安近北京即聞變告朝發可夕擒比至樂安怨望異謀益急東宮數書成竟不悛

帝巡北京皇太子監國○夏四月丁巳朔日有食之○六

月建北京郊廟宮殿○秋七月瓦剌馬哈木死封其子脫
歡爲順寧王○八月通政司上言歐寧人進金丹方書
上曰此妖人也秦皇漢武二主爲方士所欺求長生不
成之藥此人欲欺朕朕無所用金丹令自食之方書亦
與毀之母令別欺人也

老人星再見勅文武羣臣免賀○九月蘇祿國王巴都葛
叭答刺來朝○冬十月癸未朔日有食之遣禮部員
外郎呂淵使日本○十一月以趙珩爲兵部尚書巡督塞
上屯戍○金水河及太液池水疑有樓閣龍鳳花卉之狀
禮官請賀不許

戊戌十六年春正月安南黎利反鎮守總兵李彬遣兵討

之利敗走

黎利初從李擴爲金吾將軍。已而來降。令爲土巡檢。張輔還京。遂反。自稱平定王。以弟黎石爲相國。段莽爲都督。聚賊衆范柳范晏等。肆出劫掠。李彬遣都督朱廣往勦之。斬首六。僞晏彬請就交趾。戮晏以徇。黎利遁去。

陝西耀州民獻玄兔。禮官請賀。不許。○三月。賜進士李騏等二百五十人及第。出身有差。○初。令民運。○夏四月。禮

部員外郎呂淵自日本還。國王源義遣使奉表謝罪。○五

月。太祖高皇帝寶錄成。○太學士胡廣卒。廣達迎。始悅以希恩寵。卒。然文

○六月。命夏原吉楊榮金幼孜纂修天下郡縣志。○遣

禮部侍郎胡濙巡江浙諸郡。

浹陸離 上面諭曰人言東宮所行之不當至南京可
多留數日試觀何如密奏來奏字湏大晚至我卽欲觀
也浹至南京日隨朝凡見東宮所行善退卽記之佳稍
久隣居楊學士士奇曰公命使也宜亟行浹權詞謝之
曰錦衣數種未完耳至安慶始以所見皆誠敬孝謹七
事密疏以聞 上覽之大悅自是不復疑皇太子

秋八月遼東總兵劉江請築金線島墩堡從之

劉江言近因巡視各島至金州衛金線島西北望海埭
上其地特高聳可住劄千餘兵守備詢諸土人云洪武
初都督耿忠亦嘗於此築堡備倭離金州城七十餘里
凡有寇至必先過此實爲瀕海噤喉之地乞用石壘堡

築置煙燉瞭望從之

老人星三見勅諭羣臣修職○冬十一月亦力把力歪思弒其主納里失只罕而自立○十二月申嚴貪禁

是月申嚴官吏犯贓之禁進法司諭之曰唐太宗惡官吏貪濁有犯贓者必寘於法故吏尚清謹民免於陪耗貞觀之治所以爲盛朕屢勅中外諸司不許妄役一夫擅歛一錢而不才官吏恣肆自若百姓苦之繼今犯贓官吏必論如法

武當山宮觀成賜名太嶽太和山

山有七十二峰三十六巖二十四澗明之最高者曰天柱境之最勝者曰紫霄宮上執游氣下臨絕壑舊皆

有宮南巖之北有五龍宮俱爲祀神祝釐之所元季兵燬至是悉新建之五龍宮之東十餘里名玄天玉虛宮紫霄曰太玄紫霄宮南巖曰大聖南巖宮五龍曰興聖五龍宮又卽天柱峰頂冶銅爲殿飾以黃金範真武像於中選道士二百人供灑掃給田二百三十七頃并耕戶以贍之仍選道士任自壇等九人爲提點分主宮觀凡爲殿觀門廡亭堂厨庫千五百餘楹上親製碑文以記

己亥十七年春三月爲善陰陰孝順事實二書成

先是上閱載籍遇有爲善獲報者命近臣輯錄之得百六十五人名爲善陰陰尋復輯錄古今孝順之事可以

垂訓者得二百七人名孝順事實 上皆製序冠之命
賜諸王羣臣及國子監天下學校

寔義父喪起復○夏六月遼東總兵都督劉江大破倭奴
於望海埚封江爲廣寧伯○秋九月神仙傳成

上嘗覽列仙傳因命侍臣博采重加纂輯至是成賜名
神仙傳 上親製序冠之

冬十一月丁巳甘露降孝陵松栢三日○朝鮮國王芳遠
請老命其子禔嗣王○十二月勅武臣修職務

上勅武臣曰自古國家盛衰存亡未有不係於武備之
張弛漢唐世遠姑置不言近代宋太祖太宗將勇兵強
削除暴亂四海晏然及其子孫弗率武備不修醜虜僭

竊馴至海內分袂宗社丘墟元世祖時戍部嚴整甲兵
強盛天下寧謐傳至數世嗣主荒淫軍政廢弛羣雄並
作竟至覆亡我皇考太祖高皇帝受天命定天下于
時將帥效命士卒奮勇肅清奸宄遂建洪業朕嗣位以
來夙夜惕勵惟恐蹈宋元覆轍以墜丕緒爾等世有爵
祿與國家同休戚者修飭武備爲國爪牙此爾等之責
所宜夙夜究心用副倚注而比來紀律廢弛隊伍空虛
軍士逃亡悉付不問甚至通同有司受賕賣放取回軍
明有程限今縱其在外或五六年或十餘年不回及所
取回軍十無一二猝有緩急何以應調武備若此國何
賴焉是皆爾等下不恤軍士上不忠國所致自今宜鑒

古人之得失體國家之委任修職務撫士卒實軍伍繕器械使兵政振舉奸宄不作朝廷有盤石之安爾等亦永保富貴若不遵朕言仍蹈前失必罪不宥

巡按交趾御史黃宗載請覈府州縣官黜陟從之

黃宗載言交趾新入版圖勞來尤在得人今府州縣多兩廣雲南歲貢生及下第舉人未入國學乞仕遠方遂授以職既乏大學教養之素又非諸司歷試之才以故牧民者不知撫字理刑者不諳法律若候九年黜陟廢弛益多宜令到任三年以上者從巡按御史布按二司嚴核其廉污能否上狀黜陟從之

庚子十八年春正月以楊榮金幼孜並爲文淵閣大學士

○二月山東妖婦唐賽兒反命安遠侯柳升率兵討之○柳升失律於鄆石棚寨都督劉忠戰歿○山東都指揮衛青大破賊於安丘鰲山衛指揮王貴復破賊於諸城賽兒遁山東平○三月柳升下詔徵釋之

山東蒲臺縣妖婦唐賽兒作亂賽兒縣民林三妻少好佛誦經自稱佛母詭言能知前後成敗事又云能剪紙爲人馬相戰開往來益都諸城安丘莒州卽墨壽光諸州縣煽誘愚民於是奸人董彥杲等各率衆從之擁衆五百餘人掠益都鄆石棚寨爲出沒青州衛指揮高鳳領兵捕之賊夜乘間衝擊官兵潰散鳳等皆陷都布按三司以聞遣人馳驛招撫之直隸沂州衛亦奏莒州賊

董彥果等聚眾二千餘人以紅白旗爲號大行劫殺莒州千戶孫恭等往招撫不服殺其從者勢甚猖獗上勅安遠侯柳升分兵勦之柳升兵至益都圍賊於卸石棚寨賊遣人乞降詐云寨中食盡且無水升以東門舊有汲道即往據之夜二鼓賊襲官軍營都指揮劉忠力戰死黎明柳升始覺分兵追捕獲賊黨劉俊等男婦百餘人而孫兒等竟遁不獲時賊黨有鴻等攻安丘知縣張璵縣三馬爲集民夫八百餘人以死拒戰賊不能攻復帥莒州即墨之衆合萬餘人併力攻之聲言屠城於是都指揮衛青備倭海上聞安丘圍急率千騎晝夜兼行奮擊敗之賊收餘衆再戰城中人亦鼓譟出擊大敗

實爲道去殺賊二千餘人主擒四千餘人皆斬之時城中已不支復得三稍遲必陷於賊矣既而柳升至青迎謁升怒其不待已呼出之青不爲屈是日齊山衛指揮王貴亦以兵一百五十人擊敗賊衆於諸城盡殺之山東之賊悉平行在刑部尚書吳中等劾奏柳升奉命征勦山東妖賊害累兇等聖諭厚指授方略升受命不恭不卽就道初諭以賊馮萬興水且乏資糧當坐困之勿圖近功升全不留心及臨賊境又不設備致賊夜斫營殺傷五士時鄒指揮劉忠與升夾攻忠身先軍士幾被賊斃升忌其成功而不救援致忠力盡而斃賊遂得乘間遁去升遣指揮馬貴等追之所過騷擾不可勝言

升亦不問。及備倭都指揮衛青聞賊圍安丘急躬率所部兵晝夜兼行遂敗賊衆後三日升始至反忌青功而摧擊之人臣不忠莫此爲甚請治其罪。上曰朕每命將遣師必反覆籌度丁寧告戒俾圖萬全今升方命失機媚功忌能罪不可宥遂下升于獄。上以唐賽兒久不獲慮削髮爲尼或混處女道士中遂命法司凡北京山東境內尼及道姑逮至京詰之。

夏五月交趾左叅政馮貴右叅政侯保討賊黎利戰歿○湖廣衡州府同知方素易坐累卒于獄中

素易江西樂平人洪武中爲盱眙知縣廉能平恕吏民戴之陞浙江金華府同知治行益著永樂初坐累謫戍

興州未幾驛名至京以左通政奉命諭交趾叛寇陳季
攬還奏稱旨復奉命往思州廉察田宗鼎等罪狀悉得
其實還除湖廣衡州府知府往捕桂陽州峒寇龍卯銘
衆詭言卯銘已死素易不信已而果獲送京師有舖卒
訴年老惟一子今爲虎所噬素易爲文敬山神明日虎
必道側後有告蘄州民區谷庶人趙財貴不送官者上
官併劾素易不舉坐是貶獄中人多惜之按蘇子瞻
謂韓文公能馴鯨魚之暴而不能弭皇甫鐸李逢吉之
謗是則素易之謂矣

秋八月丁巳朔日有食之○九月北京宮殿成遣夏原吉
勅召皇太子詣北京

欽天監上言明年正月初一日上吉宜御新殿遂遣夏
原吉賫勅召皇太子期十二月終至北京皇太子過滁
州登琅琊山指示楊士奇曰此醉翁亭故址也因嘆歐
陽修立朝正言不易得今人知愛其文而知其忠者鮮
矣蓋皇太子爲文章尤善修每曰三代以下文人獨修
有雍容和平氣象尤愛其奏議切直嘗命刊修文以明
羣臣且諭之曰修之賢非止於文卿等當考其所以事
君者而勉之十一月皇太子過鳳陽謁祭皇陵畢周步
陵旁顧張本楊士奇曰國家帝業所自也徘徊久而後
退耆老進謁有知太祖龍興時事者留從容與語賜勞
優厚皇太子過鄆縣見民男女持筐路採草實者駐馬

問所用。民跪對曰。歲荒以爲食。皇太子惻然稍前下馬入民舍。視民男女皆衣百結。匱釜傾仆。歎曰。民隱不上聞至此乎。顧中官賜之鈔而召鄉老問其疾苦。輟所食賜之時。山東布政石執中來迎責之曰。爲民牧而視民窮如此。亦勤念否乎。執中言凡被災之處皆已奏乞停止。今年秋稅皇太子曰。民餓且死。尚及徵稅耶。汝宜速發官粟賑之事。不可緩。執中請人給三斗曰。且與六斗。汝毋懼。擅發倉廩。吾見上當自奏也。

罷北京行部及六曹清吏司分置行在六部。○定都北京除行在字稱京師。改京師在應天府者稱南京。○十二月皇太子太孫至北京。

皇太子奏前過山東境內遇民飢卽令布政司發粟賑之。上曰正是昔范仲淹之子猶能舉麥舟濟其父之故舊況百姓吾之赤子乎。

辛丑十九年春正月甲子朔上躬詣太廟奉安五廟神主命皇太子詣天地壇奉安昊天上帝后土皇地祇神主皇太孫詣社稷壇奉安太社太稷神主。祭國公沐晟詣山川壇奉安山川諸神主。○上御奉天殿受朝賀赦天下。

戊寅大赦詔曰朕荷天地祖宗之佑繼承大寶統馭萬方祇勤撫綏夙夜無間乃者倣成周卜洛之規建立兩京爲子孫帝王永遠之業爰自經營以來賴天下臣民殫心竭力遇事赴工今宮殿告成朕御正朝祇事天地

宗社眷懷黎庶嘉與維新弘敷寬卹之仁用洽好生之德大赦天下。

華戶刑二部北京司增雲南貴州交趾三司○三月賜進士曾鶴齡等二百一人及第出身有差○夏四月庚子奉天華蓋謹身三殿災詔修省求言寬恤○勅萬壽聖節勿賀以奉天等殿遇災也勅禁謗訕

三殿災言者輒云都北京不便主事蕭儀言尤峻上怒殺儀曰吾與大臣密議數月言遷都便於是言官劾諸大臣上令言官大臣皆跪午門辨難遷都利害有都御史王彭罵言官白面書生不知大計宜加重罪上令左右問衆議云何夏原吉曰臺諫職言路且應詔

陳言臣等備員大臣不能協贊大議臣等萬歎并問對如初上悅盡釋言官大臣

遷吏部尚書蹇義等二十六人巡行天下安撫軍民○禮部侍郎儀智致仕年八十矣○五月交趾總兵官李彬請分軍屯田從之○秋十月以段民爲山東左叅政

山東妖賊唐賽兒遁是時大索賽兒甚急盡逮山東北京尼慨又盡逮天下出家婦女先後幾萬人段民撫定綏輯曲爲解釋人情始安

八月辛巳朔日有食之○冬十月阿魯台叛數寇邊阿魯台數年生聚畜牧蕃富遂兇悖桀驁每朝使至輒慢侮或拘留苦之時時部落出沒塞下爲寇上嘗諭

其使還語阿魯台竟不悅至是大舉圍興和邊將檄聞
上遂議親征

赦黎利爲清化知府遣內官山壽諭利○十一月戶部尚
書夏原吉刑部尚書吳中繫掖獄兵部尚書方賓暴卒以
李慶爲兵部尚書

上命大臣議親征北虜召兵部尚書方賓賓言今糧儲
不足未可興師遂召原吉問邊儲多寡對曰僅給將士
備禦之用不足以給大軍且言頻年師出無功戎馬資
儲什喪八九災沴間作內外俱疲况聖躬少安尚須調
護勿煩六師上不懌旣而吳中入對與方賓同 上益
怒召原吉籍其家與中皆繫內官監獄於是賓懼自殺

時禮部尚書呂震數乘間言方賓與吳中夏原吉皆愼
邪誣罔。上命戮賓疑將殺原吉等。名楊榮問原吉等
平昔所爲。榮力言其無他。二三人者。惟以數征北虜之
餽運爲憂。論才力或不及。若愼邪未之見也。上怒。由
是稍釋。置不問。

壬寅二十年春正月己未朔日有食之。○二月命英國公
張輔等議北征餽運。

輔等議分前後運。前運隨大軍行。後運繼之。前運總督
官三人。隆平侯信。尚書李慶。侍郎李昶。車運驢運各分
官領之。領車運者二十六人。泰寧侯愉。都督張遠。吳顯
都御史王彰。侍郎張本。伏伯安。指揮十人。郎中員外主

事五人驢運二十五人鎮遠侯興祖都督張安尚書趙
犴侍郎崔衍都指揮李德指揮十人郎中員外郎主事
五人御史五人後運總督官二人保定侯瑛遂安伯瑛
爲之副者侍郎郭敦都指揮陳璘先指揮十人郎中員
外郎主事十人御史五人總督官各率騎兵千人步兵
五千人護行凡前後運用驢三十四萬車一十七萬七
千五百七十三輛挽車民夫二十三萬五千一百四十
六人運糧凡三十七萬石並出塞分貯

三月阿魯台攻興和守禦都指揮王祥戰歿 丁丑帝發
北京親征阿魯台 夏五月丁卯帝駐獨石大閱○六月
丙戌朔車駕次威遠川阿魯台進攻萬全

開平報虜復攻萬全。上召諸將問計皆曰宜分兵還擊之。上曰不然此詐謀也虜慮大軍徑向其巢穴故爲此牽制之術然其衆不多知大軍北行必已喪膽況敢攻城哉不足慮也

秋七月車駕次殺胡原阿魯台此走遂旋師征兀良哈大破之

秋七月己未車駕次殺胡原前鋒都督朱榮等獲阿魯台部屬送御營備言阿魯台所部聞大軍出皆憂懼曰有背叛而遁者繼聞車駕親征阿魯台舉家惴慄其母及妻聞之罵曰大明皇帝何負爾而必欲爲逆天負恩事爾必固宜而使吾屬駢首就縛而俘囚將必無葬身

處皆汝所貽禍也。阿魯台盡棄其馬駝牛羊輜重于瀾
樂海之側。與其家屬直北走矣。上曰：獸窮則走，然此
黠虜未當遽信。或挾詭謀示弱以誤我，不可不嚴備。前
哨繼獲虜部曲，亦言虜悉聚夜遁矣。驗之而信，乃召都
督朱榮、吳成等還發兵，盡收虜所棄牛羊駝馬，焚其輜
重。上召文武羣臣諭曰：朕非欲窮兵黷武，虜爲邊患
驅之足矣。將士遠來，亦宜休息。遂命旋師。是夜召諸將
諭曰：兀良哈羽翼阿魯台爲逆，殺掠我吏民。阿魯台遁
兀良哈近東塞門庭之寇，當還師翦此虜。諸將曰：然簡
部騎二萬分五道上授方略進擊。曰：兵貴神速。又曰：虜
聞我師來必西走。吾邀其西，辛酉諸將東行至清水泊。

庚午 上率精騎數萬西至屈裂兒河虜數萬驅輜重
西奔陷山澤中遇大軍倉卒逆戰上麾騎兵爲左右翼
齊進虜欲突走 上率前鋒衝之斬虜數百人虜大潰
走其地背河前左皆山大將軍輔依山而陣 上乘高
望虜虜稍復聚急麾兵繞出虜右十餘里又急分兵渡
河斷虜後虜果突而右走盡獲之又虜人共出其左十
餘里令甲士持神機弩伏深林中戒曰虜過此發山下
兵嚴陣以待虜果盡棄其輜畜馳突而左 上麾騎士
與山下兵馳追之虜驚走至林中神機弩競發虜又潰
餘虜百騎團結甚堅走且疾 上曰必酋也率騎兵追
奔三十餘里直抵巢穴擒其酋伯兒伯克等盡收其人

畜焚其輜重。訶降虜言屈裂兒河東北深谷中。有虜
餘人令寧陽侯懋以騎兵五千追之。懋率精騎伏隘中。
虜襲我輜重。方接戰。懋發伏夾擊。虜大潰。斬獲過半。凡
獲虜牛羊十餘萬。盡賞諸將士。八月戊戌。次玻璃谷。諸
將持兀良哈者。斬虜首千餘。俘其人畜。道大寧。入喜峰
口。俟上。

九月乙卯朔。車駕還京。躬告天地宗廟社稷。御奉天門。百
官上表賀平胡。○逮大學士楊士奇尚書蹇義呂震下錦
衣獄。尋釋之。○冬十二月阿魯台弑其主本雅失里。自稱
可汗。

癸卯二十一年夏四月。瓦剌脫歡攻阿魯台。敗之。○五月

常山護衛總旗王瑜上變告指揮孟賢等伏誅

常山中護衛總旗王瑜上變告言常山中護衛指揮孟賢等糾合羽林衛指揮彭旭等舉兵將推趙王高燧為主而謀不利於上及皇太子。上命急捕賊既悉得遂召皇太子趙王及文武大臣皆至。上御右順門親鞫之先是上以疾多不視朝中外事悉啓皇太子處分皇太子往往裁抑宦寺宦官黃儼江保等尤見疎斥儼等日譏之於上且素厚高燧常陰爲之地因僞造毀譽之言傳播於外謂上注意高燧以誑誘外人由是賢等遂起邪心欽天監官王射成與賢厚密言於賢曰觀天象當有易主之變賢等邪謀益急與其弟孟三常山

左護衛老軍馬恕田子和興州後屯衛老軍高正通州
右衛鎮撫陳凱等日夜潛謀連結貴近圖就宮中進毒
藥於上候上晏駕卽以兵劫內庫兵仗符寶分兵執府
部大臣豫令高正僞譏遺詔付中官楊慶養子至期從
禁中議以御寶領出廢皇太子而立趙王高燧爲帝布
置已定正以密告其甥喻瑜曰此舅氏滅族之計力止
不從喻遂入告上覽僞譏遺詔震怒立捕楊慶養子
誅之顧高燧曰爾爲之耶高燧惴慄不能言皇太子爲
之營解曰高燧必不與謀此下人所爲爾上命文武
大臣及三法司勒治羣臣奏賢等所犯大逆且有顯實
當並寘極典上曰且先籍其家王射成以天象誘人

速誅之賢等更加窮鞫母令遽死遂下錦衣衛研治等併其黨悉誅之

六月庚寅朔日有食之○秋七月降虜來言阿魯台將犯邊復議親征○命安遠侯柳升遂安伯陳瑛將中軍武安侯鄭亨成國公朱勇英國公張輔成山侯王通將左右軍寧陽侯陳懋將前鋒從征阿魯台○禮部左侍郎胡濙進太嶽太和山祥瑞禮部尚書呂震請賀不許

胡濙進瑞光圖及榔梅靈芝且奏太嶽太和山頂金殿現五色圓光紫雲周匝不散又山石產靈芝尚書呂震率百官進賀上曰朕創建太和山宮殿上資福於皇考皇妣下爲天下生民祈福可止爲已且朕德涼薄

敢特此爲祥其勿賀

八月帝大閱。遂發京師。○冬十月車駕次萬全。虜酋也先土干來降。封爲忠勇王。遂班師。

十月降胡言阿魯台將人寇。上又出塞征之。八月次萬全。虜知院阿失帖木兒右納台等率妻子來降。言阿魯台今夏爲瓦剌順寧王之子歡所敗。掠去人畜無算。部屬潰散。無統。若聞天兵復出。疾走遠避。不暇敢南向耶。上以二人爲正千戶。有先鋒陳懋。至飲馬河北。遇韃靼王子也先土干。率其妻子部落來歸。封爲忠勇王。賜姓名金忠。遂班師。

十一月帝還京

甲辰二十二年春正月速朝覲官下錦衣獄尋釋之

阿魯台寇大同○三月賜進士邢寬等一百五十人及第
出身有差○戊寅帝大閱命安遠侯柳升將中軍遂安伯
陳瑛副之英國公張輔領左掖成國公朱勇副之成山侯
王通領右掖興安伯徐亨副之武安伯鄭亨領左哨保定
侯孟瑛副之陽武侯薛祿領右哨新寧伯譚忠副之寧陽
侯陳懋忠勇王金忠爲前鋒從征阿魯台

初忠勇王金忠來歸屢言阿魯台弑主虐人違天逆命
數爲邊患請發兵討之愿身爲前鋒自効上曰兵豈
堪數動朕固厭之况下人乎忠曰如邊境荼毒何上曰
卿意甚善但事須有名文帝嘗言漢過不先姑待之至

是大同守將。奏阿魯台侵塞。遂大閱北征。上諭諸將曰。爲君奉天。愛人爲本。朕臨御以來。視民如子。內安諸夏。外撫四夷。一視同仁。咸期生遂。逆賊阿魯台。始以窮蹙。死歸撫之。甚厚。豺狼野心。不知感德。積久生慢。反恩爲讎。侵擾邊疆。毒害黎庶。違天負恩。危如絲髮。當時從將士之志。寇豈復有生理。但體上帝好生之仁。驅而逐之。亦與萬一其能改也。而獸心終焉不變。今朕必往伐之。朕非好勞惡逸。蓋志在保民。有非得已。爾等從朕。誠能奮勇成功。高爵重賞。不汝吝。如方命失機。則軍法亦不汝貸。汝其懋哉。

夏四月。詔皇太子監國。軍駕發京師。○五月。大名府。滹縣。

蝗

大名府濟縣蝗蝻生。知縣王士廉齋戒僚屬者民禱于八蜡祠。士廉以失政自責。越三日有烏萬數食蝗殆盡。皇太子聞而嘉之。顧謂侍臣曰。此誠意所格。人患無誠耳。苟出於誠。何求不得。

甲申遣中官伯力歌齋勅諭虜中部落

上召大學士楊榮金幼孜至幄中諭之曰。朕昨夕三鼓夢有若世所盡神人者告朕曰。上帝好生。如是者再。此何祥也。豈天屬意此寇部屬乎。榮對曰。陛下好生惡殺。誠格于天。此舉因在除暴安民。然火炎昆岡。玉石俱燬。惟陛下留意。上曰。卿言合朕意。豈以一人有罪。罰及

紅罕遣中官伯力歌及所獲胡寇齎往虜中諭其部落
曰往者阿魯台窮極歸朕朕待之甚厚爾等所知朕何
負於彼而比年以來寇掠不止朕間者以天人之怒罪
率師討之如徇將士之志奮雷霆之威爾等豈復有隳
類朕體上帝好生之仁亦猶冀其或改而自新也今王
師之來罪止阿魯台一人其所部頭目以下悉無所問
有能敬順天道輸誠來朝悉待以至誠優與恩賚毋懷
二三以貽後悔

六月車駕駐蒼蘭納木兒河諸將奏虜人遁遂班師

庚午師次隰寧忠勇王所部指揮同知把里禿等獲虜
謀者言虜去秋聞朝廷出兵挾其屬以遁及冬大雪丈

餘孽畜多歿部曲離散比開大軍且至復遁往荅蘭納
木兒河趨荒漠以避所以遣諜者慮聞之不實耳上
曰然則寇去此不遠遂命諸將速進以獲諜功陞把里
禿爲都指揮僉事五月己卯次開平是日雨士卒有後
至而濡濕者上見之指示諸將曰士卒者將帥所資
以成功名撫之至則報之厚古人有言視卒如嬰兒可
與赴深谿視卒如愛子可與之俱歿今方用此輩爲國
家除殘去暴其可不恤丁亥次武平鎮召諸將諭曰古
謂武有七德禁暴除亂爲首又謂止戈爲武蓋謂止殺
非行殺也朕爲天下主華夷之人皆朕赤子豈間彼此
哉今之罪人惟阿魯台餘脇從之衆悉非得已不可以

同日語自今凡有歸降者宜悉意撫綏無令失所非持
兵器以嚮我師者悉縱勿殺用稱朕體天愛人之意丙
申次清平鎮卽元之應昌路是日雨重車皆後人上諭
諸將曰輜重者六軍所恃爲命兵法無輜重糧食無委
積皆危道曹操所以屈袁紹者先焚其輜重今諸軍皆
至而重車在後爾等獨不遠慮耶遂令分兵迎之六月
丙午次翠玉峰勅寧陽侯陳懋忠勇王金忠等曰用兵
之道貴乎先知古之賢將所以動而勝人者先知敵之
情也今與師遠出而未悉賊情何以成功朕以前鋒命
爾尤宜晝夜用心其精擇勇智廣布偵邏如有所得星
馳奏來朕佇俟焉癸丑次金沙濠陳懋等得胡馬九匹

來進上曰醜虜多詐安知非以是誘我也勅懋等益加
防慎不可怠忽戊午次玉沙泉上以荅蘭納木兒河
已近令諸將各嚴兵以俟是時將士皆踴躍思奮上
聞之喜曰兵可用矣已未命陳懋金忠率師前進且戒
之曰若遇賊宜審機行事如兩鋒相當彼投戈下馬者
皆良民勿殺如其來敵先以神機銃攻之長弓勁弩繼
其後遇阿魯台亦勿殺生擒以來庚申懋等遣人奏言
臣等已到荅蘭納木兒河彌望惟荒塵野草虜隻影不
見車轍馬跡亦多漫滅其道已久上遣張輔王通等
分兵山谷大索仍命陳懋金忠前行覘賊車駕進駐河
上以俟張輔等相繼引兵還奏曰臣等分索山谷周廻

金百餘里。一人一騎之迹無睹。必其遁久矣。癸亥。限燃
得忠亦還。奏曰。臣等引兵抵白邨山。咸無所遇。以糧盡
故還。於是張輔等奏。願假臣一月糧。率騎深入。罪人必
召。上曰。今出塞已久。人馬俱勞。虜地早寒。一旦有風
雪之變。歸途尚遠。不可不慮。卿等且休矣。朕更思之。甲
子。召輔等諭曰。昨日之言。朕思之不可易也。古王者制
夷狄之道。驅之而已。不窮追也。且今虜所存無幾。茫
茫廣漠之地。譬如求一粟於滄海。可必得耶。吾寧失有
罪。誠不欲重勞將士。朕志定矣。其旋師。兵部尚書李慶
等進曰。王者之師。畏則舍之。今已鏖虜穴。破虜衆。塞北
萬里無虜跡。雖有數輩。如犬羊棲柵偷生。窮漠陛下天

地大德寧盡殺之耶時軍士乏食楊榮請供御之廩以
給之令軍中有餘者貸不足入塞官倍償之衆賴以濟
上悅命丞班師

秋七月庚寅上崩於榆木川

丁亥次翠微岡上御幄殿憑几而坐大學士楊榮金
幼孜侍上顧內侍海壽問曰計程何日至北京對曰其
八月中矣上頷之既而諭楊榮曰東宮涉歷年久政
務已熟還京後軍國事悉付之朕惟優游暮年享安和
之福矣榮對曰殿下孝友仁厚天下屬心允稱皇上付
託上喜賜榮等羊酒而退戊子上次雙流灤以旋師
遣禮部尚書呂震齋書諭皇太子并詔告天下己丑次

於庶上不豫下令大營五軍將士嚴部伍謹哨瞭東
宮於橋木川上大漸台英國公張輔受遺命傳位皇太
子且云喪服禮儀一遵太祖皇帝遺制辛卯上崩內
臣馬雲孟驥等以六師在遠外秘不發喪密召大學士
楊榮金幼孜入議喪事遂一遵古禮含歛畢載以龍輅
所至朝夕上食如常儀壬辰次雙筆峰大學士楊榮少
監海壽奉遺命馳計皇太子卽遣皇太孫出居庸赴開
平迎駕時京師諸衛軍皆隨征聚行在惟趙府三護衛
軍留京師一時浮議籍籍慮護衛爲變遂秘未發喪皇
太孫瀕行啓皇太子曰出外有封章白事非印識無以
防僞皇太子曰渠言良是但行急新製不及士奇曰毀

下未踐阼有事自應行常用之寶其東宮小圖書可假
之行此出一時之權歸即納上皇太子即取付太孫曰
有啓事以此封識來此亦久當歸汝汝就留之皇太子
曰大行臨御儲位久未定浮議喧騰吾今就以付之浮
議何由興八月己酉次鵬鶚皇太孫至軍中始發喪六
軍號痛聲徹天地辛亥入居庸關文武百官縗服哭迎
壬子及郊皇太子親王以下素服哭迎至宮中奉安仁
智殿加歛納梓宮冬葬長陵○上文武全林寬嚴兼濟
規模濶大條理精密知人善任譏間不行用兵應變機
智如神臨事閑暇決戰先登大將小校盡識能否隨才
指揮各稱任使拊循士卒同其甘苦擒王縛將推心不

城郡縣災傷蠲租賑穀軍機奏報中夜起覽總攬權綱
夢重名爵容受直言屏却祥瑞貴飾禮文經略徵寒訓
迪子孫一書萬言敦睦宗庶保全功臣收交南罷海運
通西域降北胡表章聖經謝絕封禪置內閣儒臣削藩
王兵柄海外諸國受命爲王者三十餘國長筭遠慮徙
都北平寔貽孫奕子久大之基也

八月丁巳皇太子卽皇帝位改明年元曰洪熙大赦天下
○出夏原吉黃淮楊溥於獄原吉復戶部尚書淮陸通政
兼武英殿大學士溥陞翰林學士○赦解縉妻子還鄉官
其子禎中書舍人

初文皇罷信解縉手書大臣十人寒義等名授縉曰汝

疏其人品十人者皆與縉厚善縉其實對曰義天資厚
重中無定見夏原吉有德有量不遠小人劉儁雖有才
幹不知顧義鄭賜可謂君子頗短於才李至剛誕而附
勢雖才不端黃福秉心易直雖有執事陳瑛刻於用法
好惡頗端宋濂慤直而苛人怨不恤陳洽疏通營敏亦
不失正方賓簿書之才與儉之心奏上文皇以示東宮
曰至剛朕已洞灼餘徐驗東宮因問縉建文所用人如
何對曰此皆洪武中人才事往已不足論又問尹昌隆
王汝玉對曰昌隆君子而量不宏汝玉文翰不易得惜
有市心耳東宮即位即出縉奏示楊士奇曰今人率謂
縉狂士觀所論評皆有定見也赦其長卒遣歸官其子

初爲中書舍人

九月上皇考妣謚號

皇考太宗體天弘道高明廣運聖武神功純仁工孝文
皇帝皇妣仁孝慈懿誠明莊獻配天齊聖文皇后
命減析薪司賦聚之半

士所聞析薪司賦聚於山東河南以供宮中香炭之用
至八十餘萬入將奏之時寒義夏原吉奏事未退上
望見士奇謂寒夏曰新華蓋來必有說試共聽之士奇
言恩詔甫下兩日析薪司傳旨賦聚八十萬民何以堪
上喜曰固知學士必有說吾數言皆然士奇曰此是
急遽中答之不暇致審卽命減其半

命歷事監生還監進學

中軍都督府奏本府歷事監生七人。今考所治吏事。皆勤慎。請如例送吏部。循次授官。上曰。爲士豈止習吏事而已。吏事末也。誠能窮經博古。達於修己治人之道。於吏事何難。比士習日下。率逐末以圖進取。而昧於大經大法。故用之往往厲民而辱國。自今監生歷事考稱者。仍命還監進學。俾由科舉進。庶幾士皆可用。它得其人。於是通政司引奏六科辦事監生二十人。以滿日例。應還監。幸逢維新之治。願仍就六科辦事。以圖報効。上進二十人者。諭之曰。諸生不患無位。但當圖所以無忝于位者。勿徒懷倖進之心。士有才德。使人求而用之。二

也而天下也諸生宜立志國家教育
之無自汲汲其歸進學有成朕不汝遺時六科給事中
多屬諸生萌僥倖之心上灼知之故有是命

召尚書黃福還京以兵部尚書陳洽兼掌交趾布按二司事
福以尚書兼掌交趾布按二司事視民如子勞來安輯
躬勤不倦又戒郡邑吏專一撫字曰新造之邦新附之
民政令條畫並宜寬簡中郎士遷謫至者咸見溫恤問
疾周貧禮賢雪罪兵民感悅夷蠻欣附中官馬騏怙恩
肆害福數裁抑騏誣福有異志文皇察其妄曰此君
子不容於小人不問仁廟卽位召福還曰卿老成人久
勞於外朕亟欲見卿福在交趾凡十九年及還交人扶

擄走送號泣不忍別。

加寒義少傅楊士奇少保楊榮太子少傅兼謹身殿大學士金幼孜太子少保兼武英殿大學士俱賜緋纓繒圖書○親製楊士奇等五臣誥詞

上御西角門閱京官誥詞顧大學士楊士奇楊榮金幼孜曰卿三人及寒義夏原吉皆先帝舊臣朕方倚以自輔凡朕所行有未盡善皆當盡言遂取五人誥詞親製宸翰增二語云勿謂崇高而難入勿以有所從違而或怠曰此朕實心卿等勉之士奇等稽首曰此陛下聖德巨等其敢不勉

太常少卿周納爲交趾知府

黜太常少卿周紉爲交趾所屬知府納永樂中
郎中嘗上疏請封禪不許未幾丁憂至是來朝
上曰

諛佞之人宜遠外不可以玷朝班遂有是命
命翰林院嚴考歲貢

禮部引歲貢生奏送翰林院考試 上召楊士奇等諭
曰百姓不得蒙福者由守令匪人守令匪人由學校失
教歲貢中有不通故事不明道理者此豈可授官自今
嚴考試之法不在文詞之工拙但取有理致者取之嚴
則不學者不復萌僥倖之望而有嚮進之志矣

命襄城伯李隆守備南京○冬十月令三法司會內閣府
部司科於承天門審錄重囚○選東宮官以安遠侯柳升

爲太子少傅成山侯王通陽城侯薛祿並太子太保禮部
尚書呂震爲太子少師戶部尚書夏原吉爲太子少傅兵
部尚書李慶爲太子少保戶部尚書郭資兼太子賓客刑
部尚書吳中工部尚書黃福並兼詹事曾榮王英左右春
坊大學士黃宗載詹事府丞○立妃張氏爲皇后皇太孫
瞻基爲皇太子○十一月有建文諸臣家族

上劄諭禮部尚書呂震曰建文中奸臣正犯悉受顯戮
其家屬初發教坊司錦衣衛浣衣局習匠功臣家奴今
有存者旣經大赦並宥爲民給還田土又諭羣臣曰若
方孝孺輩皆忠臣詔從寬典於是天下始敢稱孝孺諸
必義者爲忠臣云

交趾黎利復反○改大理寺卿楊時習爲交趾按察使
先是大理寺卿虞謙奏事侍臣有言此當榻前密請旨
不當於朝班對衆敷奏爲賣恩者又有言其屬官楊時
習先導之密陳而謙不從者遂降詔爲大理少卿而陞
時習爲卿士奇獨進奏事曰外間皆云時習實無導之
言今冒居卿位慙惧不安謙歷事三朝皆居通顯頗得
大臣體者且今所犯小過上曰吾悔亦念及此因問
時習人若何對曰雖起於吏然明習法律公正廉潔
上喜諭尚書蹇義曰左遷虞謙吾過矣復其大理卿改
楊時習交趾憲使

道御史分巡天下考察官吏○召內官馬騏還京

騏還未幾尋矯旨下內閣書勅復往交趾。聞辦金銀珠香內閣覆請。上正色曰。朕安得有此言。此奴曩在交趾荼毒軍民。卿等獨不聞乎。自騏台還。交人如解倒懸。豈可再遣。然亦不誅騏也。

進塞義少師楊士奇。少傅夏原吉。少保左都御史劉觀。太子少保。改吳中工部尚書。兼太子少保。金純。刑部尚書。○郭資進太子太師致仕。

上選東宮官。以郭資兼太子賓客。尚書塞義。夏原吉。力言資偏執妨事。且多病。請令致仕。上曰。先帝初舉義。兵切軍需。糧餉皆出資調度。吾時居守。竭誠輔佐。甚得資力。今出危履安。乃遂棄之。吾誠不忍。問士奇曰。資爲人如

何對曰資強毅但性偏執甚至沮格恩澤不流於下。上問其故對曰詔勅數下蠲免災傷租稅資不聽開除必責有司依歲額徵納此其過之大者。上曰吾在此又有原吉與之同事當不復偏執矣無幾寒夏又數數言資偏執妨事不去資仁政必爲所格。上從之命資以太子太師戶部尚書致仕。

十二月加楊榮工部尚書○作觀天臺於禁中○徙封韓恭王於平涼○罷朝覲方面郡縣官畜馬之令

兵部尚書李慶言曰今歲北方之民畜馬頗蕃皆送至京已散軍伍操用尚餘數千欲散民間畜則民甚弊不可重困之今遠近方面郡縣朝覲官皆集請每員給一

馬俾畜正官給牡佐貳以下給牝太僕苑馬寺歲課其
息有虧罰與民同 上令與群臣商略可否楊士奇曰
朝廷以禮徵士上者授方面次者授百執事今皆役之
畜馬以蘇民是貴民而賤官矣如必欲行此令天下懷
抱才德者誰肯出仕蓋虧損一馬必責賠償破家廢產
累及子孫且所散不及三千而朝廷負此名於天下後
世誠非佳事會陝西按察使陳智上言畜馬風憲受制
上謂士奇曰爾就據此草勅止散馬士奇曰馬已有領
夫者望如何處之 上曰已領者准洪武中官員乘馬
例給之不責生息虧欠亦不責償未領者悉止未散之
馬給邊軍操用

諭戶部令天下衛所不許擅差屯軍

上諭戶部尚書夏原吉曰古者寓兵於農兵食自足無待轉輸漢之屯田猶有古意先帝立屯種法用心甚至迨後所司以征徭擾之既違農時遂鮮收穫以致儲蓄不充未免轉運其令天下衛所凡屯田軍士自今不許擅差妨其農務違者處重法按軍國之事備邊爲急脩邊之務兵食爲先屯田之要乃足食足兵之要道而通商種鹽則又所以維持屯田於不壞者也洪樂間唯純任此法所以邊圉富強不煩轉運而蠲租之詔無歲無之也後來屯田鹽法漸非其舊而邊餉不足軍民俱困矣豈其弊端固已濫觴於此而况營私漁利者日滋其

說平

書都布按三司官姓名於奉天門西序

十二月書各都布按三司官姓名于奉天門西序。先是上諭蹇義李慶曰。庶官賢否。軍民休戚之所係。唐太宗書刺史之名於屏。朝夕省覽。皇考亦嘗書中外官姓名於武英殿南廊。時一觀之。今府部之臣。朕朝夕接見。得詢察其賢否。若都布按三司官。朕既不能盡識其人。又不悉其姓名。雖或聞其賢否。久則易忘。爾吏部兵部。其各都布按官姓名履歷。揭諸西序。朕得時考其行事而黜陟焉。至是悉書之。

罷海子至西湖巡視官

罷海子至西湖巡視官西湖受房山之水流經城南山注海子凡三十餘里官常遣人往來巡視禁民不得取魚而並緣爲姦者其旁近之草及灌田之水民皆不得取至是上命吏部悉罷之謂尚書蹇義曰古者山澤之利皆與民共之朕之心凡可推以利民者雖府庫之儲不吝况山澤所產哉

賜勅獎諭大學士楊榮

初文皇班師疾作頻劇已而崩於榆木川中官馬雲等皆愴惶莫知所措密召榮幼孜入幕中榮等循古制用衾衾殯殮或有欲以他事寫勅用寶遣人馳報者榮曰先帝在即稱勅頒天而稱獲罪非輕乃令中官以先帝

崩逝日月并遺命傳位之意具啓馳報榮初抵京上
哀慟未及訪問至是有以爲言者遂降勅獎諭之

大理寺少卿戈謙以言事免朝叅止令坐司視事○是年
師遼爲南京戶部尚書兼掌吏部事